

مبادرة  
القراءة بالمجانة



مدير النشر: فتحي المزين

01282288056

layanpub@gmail.com



الكتاب: فتافيت الماس

الكاتب: نادية عبد الغفار

رقم الإيداع: 2022 / 2850

ISBN: 978-977-800-37-2

تصميم الغلاف: محمد عبد القوي مصيلحي

تدقيق لغوي: حكمت مصطفى

وأى محاولة للطبع أو النشر بأى  
طريقة دون موافقة كتابية يعرّض  
صاحبها للمساءلة القانونية

جميع  
الحقوق محفوظة

نادية عبد الغفار

# فتافيت الماس

تغريدات برّه السّرب





## إهداء

لإيقونة الثورة على المؤلف ومحرض الأحلام الممكنة

محمد منير...

ولكل واحد مش بيتجمل علشان الناس تقبله

ولكل اللي بيعمل اللي هو مؤمن بيه ومصدقه

ولكل اللي ما شافش الجموع ماشية على فين فمشي وراهم

ولكل واحد رفض يعيش عادي، فقرر يكون.. نفسه



## امتنان

ممتنة بألوان السما السبعة لأحب الناس إلى روحي، أولادي  
على كل الدعم والحب والسندة والصحوية



## كلمة من القلب

مفيش أجمل من إنك تلاقي كلمات تلهمك وتتسند عليها  
فتقوم لو في يوم جه وقت انكسار  
كلمات تدي لك معادلة للحياة شديدة البساطة لدرجة  
التعقيد ومصاغة بعبقريّة  
كلمات تنساب لوجدانك بصوت صافي زي ميه النيل، صوت  
قلب مش ضعيف صوت ما يعرفش الاستسلام  
ترسم لك قانون للحب وقانون للحلم وقانون للحياة وفي  
الوقت نفسه تعلمك إزاي تتمرد عليهم وهي بترسم لك قانون  
للحرية  
علشان تخرج من البيان الي أنت قافلها بنفسك على نفسك  
وتقولك اتنفس الحياة حتى لو جارحة  
وتديك فرشاة وألوان وتقول لك لوّنها لون فرحة علشان  
الدنيا لسة بخير والحياة.. رقصة شهية  
فلو بتحب الحياة والحب والألوان والإلهام ضروري تكون  
منتبه لرسايل الكون الي ربنا يبيعتها لك  
رسايل الكون الي ممكن تيجي لك على شكل كلمات،



كلمات تحفر مكانها في القلب وتشكل الوجدان وتكوّن جزء من  
مخزونك وتراثك الشخصي جدًّا والحقيقي جدًّا.  
من قلبي لقلوبكم نور ومحبة وكلمات فيها من روعي الكثير  
من قلبي لقلوب كل اللي أبدعوا بالكلمات الملهمة.. تحية  
وامتنان وتقدير

## ألوان الحب

الشعب حبيبي وشرياني.. أهداني بطاقة شخصية  
الاسم الكامل إنسان.. الشعب الطيب والديا  
المهنة باناضل باتعلم تلميذ في مدرسة شعبية  
والمدرسة فاتحة على الشارع  
والشارع فاتح في قلبي.. أنا قلبي مساكن شعبية





## يهمني الإنسان

لا يهمني اسمك ..

لا يهمني عنوانك ..

لا يهمني لونك ولا ميلادك .. مكانك ..

يهمني الإنسان ..

أنا كمان زيك يا منير .. «يهمني الإنسان ولو ملوش  
عنوان» ..

دايمًا بفكر في المعجزة دي، الكائن المكرّم الي ربنا سخر له  
جميع خلقه وأودع فيه أسرارَه؛

علشان تكون دي القاعدة الي بتعامل بيها مع أي إنسان ربنا  
قدّر أن دروبنا تتلاقى،

أو أي إنسان ربنا بيحطه في طريقي إما علشان يساعدي وإما  
علشان أساعده.

ما احنا دايمًا محتاجين لبعض.

بلاقيني بسمعه بقلبي مش بودني، وأبص لروحه مش  
لعينيه ..

أتقبّل بشرّي الي موجودة فيه ..



أَتَقَبَّلُ لحظات الضعف والأخطاء.. وممكن كما تقول التيه..  
بُص بعين التقدير لما أشوف إصرار وطموح على النمو  
والنضج..  
وببقى عايضة أحضن الروح التواقة للترقي والتزكية علشان  
أغمّرها بكل الحب..  
وليه معملش كده؟  
وأنا وإنت إيا كان شكلك ولا لونك ولا دينك.. صنع الله.

## افتح بيان الروح

مفهوم الناس للسعادة متفاوت، كل شخص يشوفها على حسب اهتماماته..

لو سألت ١٠٠ شخص عن السعادة ممكن تطلع بـ ١٠٠ تعريف؛

فيه اللي هيشوفها في الصحة، وفيه اللي هيشوفها في المال، وممكن في حب الناس، الرضا، الاطمئنان، راحة البال.

وفيه اللي هيقولك إنك لما تكون سبب في إسعاد الآخرين ده سعادة في حد ذاته..

وده بالتجربة حاجة صحيحة، فعلاً بتحس بشعور رائع إنك أدخلت السرور والفرح على قلب حد.

ويمكن المعنى ده ذكره (مارك توين) لما قال: «إن السعادة تتحرك نحو اتجاهك، في الوقت الذي تبدأ فيه بضخ السعادة تجاه الآخرين».

وخلينا نتفق إنه مينفعش نتكلم عن السعادة، وإزاي ممكن تحس بيها لو قدمتها لغيرك من غير ما نقول إن أول شخص



محتاج إنك تسعده هو انت؛ علشان تقدر تقوم بالواجبات اللي عليك وتقدر كمان تسعد اللي حواليك.

وخلي بالك مش الظروف هي اللي بتخلينا سعداء أو غير سعداء، لكن كيفية استجابتنا للظروف هي اللي بتحدد ده.

والحياة مش دايماً سعيدة، ده شيء كلنا متفقين عليه، ومفمش حد مننا حياته خالية من المشكلات؛ أصل احنا عايشين في الدنيا يعني مش في الجنة...

بس فيه فرق بين حد بيركز في المشكلة، وفيه حد تاني بيركز في الحل.

فيه فرق بين حد بيزعل من أي شخص أو موقف، وحد بيعدي، أو بيعاتب ويسامح.

يعني لو أي ظرف هيعدي عليك، هتختار إنك تعيشه بحالة من الرضا، والتسامح، والطمأنينة، والسلام النفسي، فده معناه إنك اخترت تكون سعيد.

اخترت إنك تفتح ببيان روحك لاستقبال رسايل الكون، وإنك عارف إن ربنا حتى في أحلك الظروف هيبعتلك شعاع من نور.

## ده عينك شبايك

بيقولوا إن العينين مرآة الروح،  
وقال ابن القيم «إن العيون مغايرف القلوب، بها يُعرف ما  
في القلوب، وإن لم يتكلم صاحبها».  
شفت قبل كده النظرة الحاملة، والنظرة المعاتبية، والنظرة  
الواثقة، والنظرة الحانية، وكم ان النظرة اللي بتطق شرار، مش  
كده؟! حتى لو صاحبها متكلمش.  
كأن العين شبك بتشوف منه اللي النفس بتحس بيه من  
مشاعر، كأنها بوابة مرور بتقدر تفوت منها لجوه، حتى لو  
الشخص اللي قدامك كان بيحاول يظبط تعبيراته وتصرفاته.  
وكل واحد له بصمة وتأثير خاص جدا بيعكس اللي جواه  
لأبي حد يقابله، يا ترى لما الناس بتبص في عينك بتشوف إيه؟



## مش كان أحسن حاسبتك

قالوا في المثل العتاب على قدر المحبة؛  
يعني لو لقيت تصرف من شخص بتجبه ضايقتك، فالأفضل  
إنك تعاتبه.

أيوه ساعات العتاب بيوجع ويألم، بس عدم المصارحة  
بالحاجة الي ضايقتك هيوجع أكثر.  
أصل الزعل ممكن يكون بسبب سوء فهم..  
الزعل غالباً بييجي من مفهوم لم يُقصد؛  
يعني الي إنت فهمته مش ده الي كان يقصده،  
أو مقصود لم يُفهم؛  
يعني الي هو يقصده إنت ما فهمتوش.  
طب ما نسأل!

ولو طلع الي احنا فاهمينه صح، نعاتب بلطف؛ علشان  
نحافظ على المودة، ونحافظ على الحاجة الحلوة الي بينا..  
عاتب عتاب الي بيحافظ على العلاقة، مش الي عايز  
ينهيها.

احنا اتفقنا إن العتاب على قدر المحبة؛  
يعني مش علشان أحاصر الطرف الثاني، وأوجه له أصابع  
الالتهام،  
ومايكنش طول الوقت عتاب على كل صغيرة وكبيرة.  
العتاب فن، ضروري يتقنه كل واحد بيحب، ويستخدمه  
علشان يحرك المشاعر، ويحيي القلوب؛  
فخلي عتابك غالي، وزبي ما قال (جبران خليل جبران):  
«العتاب كالحب، فلا تعطه إلا لمن يستحق».



## أبشروا

يقول شيخ الإسلام (ابن تيمية):

«تأملت أنفع الدعاء، فإذا هو سؤال العبد الله العون على مرضاته، ثم رأيت في الفاتحة في قوله تعالى (إياك نعبد وإياك نستعين)».

علشان نعبد ربنا محتاجين نستعين بيه،

والنبي - صلى الله عليه وسلم - وصى سيدنا (معاذ) رضي الله عنه، إنه يقول بعد كل صلاة: «اللهم أعني على ذكرك وشكرك وحسن عبادتك».

أجمل حاجة في علاقتنا بربنا؛ إنها علاقة بسيطة وواضحة.

أقرب إليك من حبل الوريد..

معاك أينما كنت..

يعلم سرّك وجهرك..

لما بتغلط، منتظرك تستغفر وتتوب..

لما تعمل حسنة، يبضاعفها لك..

أجمل حاجة في علاقتنا بربنا؛ إنها مفهومة وسليمة، مننا ليه

على طول،

فلو لقيت نفسك بعيداً، أقبل ولا تخف..  
عايز تقرب له، ادعي واطلب منه وإنه مستشعر القرب  
والافتقار..  
ما هو هدعي مين طيب لو مدعيتوش..  
هستعين بمين لو مستعنتش بيه..  
هيئن ضعفي وافتقاري لمين غير ليه؟



## مالية جيوبها سكر نبات

فيه ناس بتحب العطاء، كأنها مجبولة عليه..  
بتحس وهي بتدي بمتعة، مش كأنها هي اللي أعطت، لأ،  
كأنها هي اللي أخذت.  
ومش شرط خالص يكون العطاء ده مادي، بالعكس، أعظم  
الحاجات في الدنيا هي الحاجات اللي الفلوس متقدرش تشتريها؛  
قعدة حلوة مع أصحاب بنفوس صافية، كل واحد بيدي من  
وقته وروحه..

مساعدة لحد بنصيحة صادقة في وقت هو محتاجها فيه،  
معلومة إنك وضحتها لحد من زميلك في الدراسة أو في  
الشغل،  
كلمة حلوة قلتها لحد بنية إدخال السرور على قلبه،  
حتى البسمة اللي بتقابل بيها أي حد دي عطاء،  
ومفيش حد فينا معندوش حاجة يقدمها، كلنا مليونين  
بالخير.

دايما بحب أذكر المثل ده:

حارس البيت عندنا لما يشوفني طالعة وشايلة أي حاجة  
بيجي يشيلها عني..

هو هنا إداني من صحته ووقته ومش منتظر مني مقابل،  
بشوفه تطبيق عملي لآية {و مما رزقناهم ينفقون}،

أنا بشوف الآية دي بمعنى أشمل وأعم؛

أصل الرزق مش فلوس وبس،

ربنا رزقك بعلم، بحكمة، بحلم وطولة بال، بقلب بيعرف

يجب، أنفق منهم ووظفهم صح.



## فتافيت الماس

بُص حوالياك كده في محيط قرابيك وأصحابك ومعارفك  
هتلاقي ناس كتير أوي حلوة من جوه وعلاقتك بيهم مبنية على  
معاني جميلة زي الحب، الاحترام، التفاهم، التعاون، التواصل  
والتشجيع وأهم من ده كله التقبل.. هم بيحبوك كده زي ما  
أنت

وأنت كمان خد منهم أحلى ما فيهم وما تركزش في عيوبهم  
أصل إحنا مش ملايكة

الناس اللي بتهتم بأمرك ومش فارق معاهم ابدامين اللي  
بيسأل عن الثاني كل مرة.

الناس اللي مش بتفهمك غلط واللي أنت مش محتاج تبرر  
لهم كل كلمة أو تصرف منك.

الناس اللي بتحسسك دايمًا أن فيه أمل وأن الحياة لسه فيها  
حاجات حلوة .

الناس اللي نجاحك يسعدهم علشان أنت كمان بتبادلهم  
نفس الشعور وفرحتهم بتزيدك فرحة

الناس الجميلة اللي زي الماس دي.. لازم تصونها.

## إشراقة

فيه أرواح بتتدفق زي المياه الصافية العذبة..  
تنساب جواك بسلاسة..  
ترويك وتشبعك وتطفي ظمأك..  
أو تاخذ في طريقها كل آلامك وأحزانك، وتطهرك..  
وتحول روحك الجذباء إلى واحة خضراء..  
لما تصادف أرواح زي دي.. افتحلها قناطر قلبك.



## ولا يمكن طلبة هترسم كون

بيقولوا إن بعض الكلمات نور، والبعض الآخر قبور..

علشان يوضحوا أهمية الكلمة وقد ايه هي خطيرة في تأثيرها.

تعالى نتخيل كده لو حد من أقرب الناس ليك جه واشتكالك إنه واقع في مشكلة أو عنده تحدي بيمر بيه في حياته بسبب تصرف عمله غلط،

أغلب الظن إنك هتخفف عنه وتقوله وإيه المشكلة، ما كلنا بنغلط، وخذ من الموضوع الدرس المستفاد، وهون على نفسك وإن شاء الله المرة الجاية الموضوع هيظبط، وممكن كان تقدم نصيحة صادقة، وتعرض عليه إنك تساعده على قد ما تقدر.

لكن لو إنت اللي في نفس المشكلة وارتكبت نفس الخطأ، يا ترى كلامك لنفسك بيكون ازاي؟

هل إنت من نوعية الناس اللي بتقول لنفسها إن ربنا سبحانه وتعالى يسامحنا لو اخطأنا وتوبنا واستغفرنا،

فأنا مين علشان مسامح نفسي؟

فده يديك شعور بالخفة والحرية وإنك تكون نفسك، على

حقيقتك، مش مضطر تتجمل ولا تلبس أقنعة علشان تبان في  
أحسن صورة،

ويديك كمان شعور بالتححرر، التحرر من قيد مينفعش أغلط،  
فده بيفتح قدامك آفاق كتير أوي مكتتش هتشوفها وإنه تحت  
أسر القيد ده.

ولا إنت من نوعية الناس الي بيتعاملوا مع نفسهم بقسوة  
غريبة، ولوم شديد، وعتاب، وبينكروا على نفسهم بشريتهم،  
وعايزين يعملوا توليفة من الكمال والمثالية مطبوعة بالشعرة،  
ولو ده محصلش، بيدأوا يجلدوا نفسهم:

إزاي أنا أعمل كده؟!!

المفروض ما ارتكبتش الخطأ ده!!

أو المفروض الحاجة تتعمل صح، وتكون مية مية من أول  
مرة!

طب الخطأ حصل..

كأنه مش كفاية.. لأ زود عليه تأنيب النفس وتوييخها..  
ومشاعر غضب على النفس علشان غلطت..

مع إن ده مبيحصلش مع أصحابك مثلاً، بتكون متفهم  
ويتنصح بحب واحتواء،

طيب هو إنت ما تستحقش المعاملة دي؟

هو إنت مش محتاج تعامل نفسك بحب واحتواء وتفهم  
برضه؟



لو فيه بشر عاديين زينا كده مبيغلطوش، هقولك أنا معاك،  
يلا علق لنفسك المشانق..

لكن هل فيه بشر مش بيغلط؟

طبعا مفيش إنسان عاقل سوي هيتعمد إنه يغلط؛

علشان كده دي مش دعوة إننا نستمر في الغلط، ولكن دعوة  
إننا منجلدش ذاتنا لما نغلط،

ونكلم نفسنا زي ما بنكلم أي حد بنحبه،

دعوة للترفق بالنفس ومحاسبتها، وإننا نديها فرصة للنمو،  
وتصحيح المسار.

وخلينا هنا نفتكر جملة جميلة لـ (مصطفى محمود) بتقول:  
«ليشق كل واحد أن تحت مظهره العادي بذرة في مكان ما، بذرة  
عبقريه عليه أن يبحث عنها ويكتشفها، وسوف يكون كل شيء  
بعد ذلك ممكنا».

## إمبارح كان عمري عشرين

من حوالي شهر ودعنا سنة فاتت من عمرنا، ووقفنا على  
عتبات سنة جديدة مستبشرين وكلنا أمل،  
موضوع العمر ده في الحقيقة خطير جداً، وخطورته في طريقة  
تعاملنا معاه،

واحنا صغيرين كنا بنتفنن في تضييع الوقت، وكان أكثر حاجة  
بنستهلكها تقريباً،  
عايزين نعمل أي حاجة تخلي الوقت يعدي، وبنحس بأنه  
ياااه ايه الملل ده!

ودايماً مستنين حاجة، فاكرين جرس الفسحة، وفرحتنا بيه،  
وخرناقتنا البرئية على حاجات قررنا احنا إنها مهمة وتستحق  
الخرناقات، حتى لو الكبار مكنوش شايفين كده..

ولسه فاكرين إزاي كنا بنستنى ليلة العيد بسعادة مفيش زيتها،  
مترقبين العيد اللي هيبجي ومعاه هدايا، وحلويات، وعيديات؛  
علشان ننافس بعض مين جمع أكثر.

تمر السنين فنكبر شوية، ونفضل برضه نستمتع بالحاجات



اللي كنا بنستمتع بيها واحنا أطفال بس يمكن بطريقة ارتدت زياً وقوراً..

وفي نفس الوقت بنفهم إن اللي كنا عايزينه يعدي ويجري ده، كان عمرنا..

والسنين تزود على أكتافنا عمر كمان، ونبص ورانا ونقول باستغراب، إيه ده العمر عدى إزاي بسرعة كده؟

ده أنا لسه فاكّر أول يوم ليّ في المدرسة كأنه كان من كام سنة..

ولسه حاسس بفرحتي بلبسي الجديد في ليلة العيد..

إيه اللي حصل؟ إمتى بقى بيتقال لنا عمو أو طنط!

ولما نيحجي نُسرح ونبص فلاش باك على شريط عمرنا كده،

هنلاقى فيه مننا اللي بيص بعين الرضا، ويقول لو العمر

اتعاد تاني هعمل نفس اللي عملته وهختار نفس اختياري،

ويضحك لما يفتكر أخطائه، ويقول: ويمكن أعمل نفس

الأخطاء برضه تاني؛ لأنها هيّ اللي خلتني الإنسان اللي أنا عليه

دلوقتي، ويص على امبارح بعين الامتنان، وييعت له قبلة

ملونة بألوان الحياة.

وفيه مننا ناس تانية هنلاقيها زعلانة من اللي شافته وبتحس

إن العمر اتسرق منها، وإنها لو بإيديها ترجع مكتتش عايزة حياتها

تمشي بالشكل ده، وقافلة باب المصالحة مع امبارح، وبتبص على

بكرة وهي شايلة دفاتر تعبت من كتر اللي مكتوب فيها، ومع

ذلك ساجنة نفسها جواها، فكانت هي السجين والسجان.

وأيا كانت نظرتك اللي هتبص بيها على سنين عمرك اللي  
فاتت، تعالى نقف على ناصية اللي جاي بأحلام وآمال عصية  
على الاستسلام، ونغلفها بحسن تدبير الله لينا،  
وخفف حملك، ولا إنت مش عارف إن هيكون صعب عليك  
تمشي على الحبل المضروب بين اللي راح واللي جاي، وإنت شايل  
همولك على ضهرك؟!!



## أبعد حزني

- اللي هيقابلني وهو مكشر هضحك أنا في وشه.  
- اللي هيعرض عني لما يشوفني .. لما أشوفه تاني أنا اللي هبدأ بالسلام.  
- اللي هيحيني بتحية فاترة هحييه بأحسن منها.  
- اللي مش هيسأل عني .. هسأل أنا عنه.  
- اللي طريقتة في الكلام جافة .. هيكون كلامي لين معاه.  
- اللي هيؤذيني .. هدعي له وأنا بدعي لنفسي .  
حاجة مش سهلة!!!!!! مش كده!!!?  
المعاملة بالمثل أسهل ،  
ربنا عارف إنها حاجة ثقيلة على النفس ومتعسرة، بس مش مستحيلة ،  
يعني مش مستحيل تتعمل، لا بتتعمل ...  
طب إزاي؟!  
التحرر من العبودية للنفس، ونسأل الله العون على سلامة الصدر، والحماية من وسوسات الشيطان ..

أصل الشيطان هو اللي عايز يخلي بينا عداوة وبغضاء..  
وتبقى مشاعر الحزن هي اللي مسيطرة علينا..  
والصبر على الدفع بالتي هي أحسن لحد ما تبقى سجيّة،  
بتتعمل بدون عناء أو تكلف..

أصلها مش شطارة منك، ده اصطفاء لو طلبت من ربنا..

علشان كده ربنا قال:

«وَمَا يُلْقَاهَا إِلَّا الَّذِينَ صَبَرُوا وَمَا يُلْقَاهَا إِلَّا ذُو حَظٍّ عَظِيمٍ».

ربنا يجعلنا من أصحاب هذا الحظ العظيم، ويعد عنا كل  
ضيق وحزن وثقل.

اللهم تعبداً ليك وقوة بيك، ومش ضعف ولا هوان.



## بالاختصار بحبني

- الله حلو الورد ده أوي، مين اللي جابه لك؟

- أنا.

- إيه؟

- أيوه أنا جتتهولي.

في كل مرة بتسأل السؤال ده، ويجاوب نفس الإجابة، بتقابل  
بنفس نظرات وكلمات الاستغراب،

بس أنا مش شايفة في الموضوع أي ندهاش، غير اندهاشي من  
اللي بينكر على روعي حقها في ممارسة بعض طقوس السعادة.

كل ما بعمل حاجة، بحب أقول لنفسي well done على المجهود  
اللي عملته،

ولو عندي يوم مهم، بحب أشجعني في بدايته،

ده غير إن الورد مصدر سعادة بالنسبة ليّ لوحده، فبداية اليوم  
بالورد بتديني طاقة وبهجة مش طبيعية.

إيه اللي هيحصل يعني لو شجعت نفسك على انتصاراتك  
الصغيرة؟

إيه اللي هيحصل لو في بداية يوم مهم بالنسبة لك إديت  
لنفسك قبلة حانية بطعم الأمل؟

أنا بشوف إن أي شخص بيحب العطاء، مينفعش يدي الناس  
الي حواليه حب وتشجيع ودفعة، وميديش لنفسه..

مينفعش تعامل الآخرين بسخاء، وتبخل على نفسك؛

علشان كده من أكثر الناس الي محتاجة أقف جنبها هي أنا،

أصلي لو فاضية من جوه مش هعرف أدي..

مش هعرف أقوم بدوري، وفيه سبب تاني عبر عنه (صلاح

چاهين)، لما قال:

بالاختصار.. بحبني..

ما أنا أصلي ليا زمان معايا..

بتكسر وتنتي..

ونفتقر ونتغني..

ونفرد ونبخني..

أحداث كتير عشناها يااااه..

متحالفين مع بعضنا ضد الحياه..

وعمري ما خنتني

وعمري ما سيبتني

للوحدة تاكل فرحتي وتهديني

بقولكم بحبني

والله لو ينفع.. لكنت قمت وبوستني



## إنّتي نبع الحب صافي

بعض السيدات اللي اشتغلت معاهم، كان عندهم فكرة أو مفهوم مش صحيح؛ وهو إن لما الست تكون بتراعي بيتها وأولادها بتفتكر إن ملهاش دور، وإنها مبتعملش حاجة.

كانت عندي كلاينت بتقوم بدور عظيم جداً لاولادها اللي في مرحلة ابتدائي، وبتراعي والدها ووالدها المسنين اللي قاعدين معاهما في نفس العمارة.

كانت متصورة إن العمر بيجري منها، وهي مبتعملش حاجة، وده مسبيلها إحساس صعب أوي بالضيق والتذمر من الوضع اللي هي فيه،

الوضع اللي هي وصفته بـ «أنا مبعملش حاجة في حياتي».

مع إن وقتها مليون جداً، وبتقوم بدور محدش هيقدر يعمله غيرها في المرحلة دي من حياتها.

عادة كل واحدة مننا بتلعب أكثر من دور في حياتها وكل دور منهم ميقولش أهمية عن الثاني،

والأدوار دي كمان ممكن تختلف في كل مرحلة من مراحل حياتنا،

وطبيعة الدور برضه نفسها بتختلف علشان مسؤولياته  
بتختلف؛ يعني لو إنتي أم مثلاً لطفل رضيع، مسؤولياتك  
هتكون مختلفة عن لما يكبر شوية، ويدخل مرحلة الطفولة،  
وبرضه غير لما يدخل مرحلة المراهقة والشباب.

فلو إنتي ست بيت.. متقوليش أنا مش بعمل حاجة.

إنتي بتعملي حاجة عظيمة جداً، إنتي بتقدمي اليي محدش  
غيرك هيعرف ولا يقدر يقدمه..

إنتي الحضن اليي جوه منه قلوب كثير..

بس رمانة الميزان من وجهة نظري، إنك تحطي نفسك جوه  
المعادلة، وتهتمي بنفسك، وتراعيها زي ما تراعي اليي في البيت.  
وأيا كان دورك اليي ربنا استعملك فيه ما تقلليش منه أبداً!



## علموني

في بداية حياتي كأ م لسه صغيرة وقعت في فخ  
حاجة كده أنا سميتها بعدين «أعراض الطفل الأول»؛  
إن الطفل - بالذات الاول- لازم يكون متفوق جدًا في المدرسة  
مينفعرش ينقص وإلا تبقي إنتي أم مش قايمه بدورك.  
معرفش إيه العلاقة، والرابطة دي جت من فين؟  
بس وقعت في الفخ ده زي ما قلت لكم أول كام سنة مع  
بنتي الكبيرة،  
و كنت بروح أوقف لهم المدرسة على رجل لو نقصت نص  
درجة!! أه والله!  
طبعا ده كان بيولد حالة من التوتر والعبء النفسي والعصبي  
عليّ وعليها وعلى البيت كله، كل شهر وقت الامتحان حالة  
طوارئ!  
أومال بنتي ماتتفوقش وتقفل الامتحانات وتبقى فاشلة!  
وأنا أبقى أم فاشلة؟!  
إزاي؟ مينفعرش.. الناس تاكل وشنا!

بس بعد شوية وفي رحلتي مع ولادي، اكتشفت إن الطفل  
السعيد السوي اللي بيعمل الحاجة وهو مستمتع بيها، أهم  
عندي بكثير من طفل متفوق مضغوط غير مستمتع بطفولته.  
ولما خفّ قبضتي شوية، أيوه هيّ كانت قبضة..  
الأمر مشيت بشكل أطف، والعلاقة بينا بقت أفضل،  
وكانت بتنجح برضه الحمد لله، بس الأهم سعيدة،  
ولو فيه أي نصيحة كأم عايزة أقولها لأي واحدة في بداية  
رحلة الأمومة بلاش تقعي في الفخ ده..  
بلاش تشني حرب على أولادك بسبب الدرجات..  
ومتربطيش نتيجتهم لا بيكي ولا بيهم..  
وإن ابنك أو بنتك يكون مستمتع وسعيد معاك، أحسن  
بكتير، وعلاقتكم وسلامكم النفسي أهم من أي حاجة تانية،  
وصدقيني فيه حاجات كتير أوي هيتعلموها من بره المناهج،  
هيتعلموها منك وإنّي كمان هتتعلمي منهم.



## حاجات وبتفرح

لما ربنا بيحب حد بيسر له الطاعة، يعني تلاقي نفسك لو  
نويت تساعد حد ربنا بيقدرك ويساعدك.  
لو نويت تعمل خير، ربنا بيفتحلك بدل الباب اتين وتلاتة.  
مثلاً بتقرأ قرآن أكثر ما كنت مخطط، بتحافظ على الفروض  
والنوافل وفيه بركة في الوقت غير طبيعية.

تسير الطاعة علامة حب الله لك.

مفكرتش وإنت نازل المسجد إن فيه ناس نازلة للقهوة  
ومضيعة صلاتها؟

مفكرتيش وإنتي مفرغة وقت لقراءة القرآن، إن فيه ناس  
مظبطة مواعيد يومها على مواعيد المسلسلات والبرامج بس!  
مفكرتش وإنت بتساعد حد او ماشي في قضاء حاجة قصدك  
فيها أي شخص، إن فيه غيرك بيتنصل، ويقول ياعم سيك منه  
ده مش بيفتكرني غير لما بيكون عايز حاجة!!  
أصل إنت عرفت ربنا، فأحبتة، فأطعته، فأحبك، فبقيت في  
معيته وحفظه وتيسيره.

بس هنا فيه نقطتين غاية في الأهمية:

• محتاج تحمد ربنا جدا إنه منّ عليك بالعمل الصالح فده من فضله وكرمه...

« قُلْ إِنْ الْفَضْلَ بِيَدِ اللَّهِ يُؤْتِيهِ مَنْ يَشَاءُ ».

وإنك لما لقيت فرصة لعمل الخير ربنا سبحانه وتعالى أعانك ومأخر كش.

• إنك لو فيه حد لاه أو غافل - وكلنا مُقَصِّرُونَ - تسأل الله له الهداية وتحمد الله على العافية كما قال الإمام مالك:

«ولا تنظروا في ذنوب الناس وانظروا في ذنوبكم، فإنما الناس مبتلى ومعافي فارحموا أهل البلاء واحمدوا الله على العافية»،  
وإنك مينفعش تسخر من حد لمجرد إن طريقته في ارتكاب الذنوب غير طريقته.



## حبيك بعث لك هدية

كنت بتناقش مع حد من أصدقائي في موضوع، والكلام  
جاب بعضه، لحد ما وصلنا لإيه بقى..

إنه ممكن في أي فترة من الفترات أي حد بيمر بـ ups and downs  
علاقة تفر كرش..

شغل يقف..

فقدان حد عزيز..

حالة توهان..

مفترق طرق..

ده العادي!

الي مش عادي انك ما تتقبلش الـ down ده...

بمعنى أوضح، بتقول لنفسك:

أنا تمام..

مفيش حاجة حصلت..

وأي مشاعر بتحسس بالضعف أو باللخطة حتى، بتتعامل

معاها بتعالى (الي هو أنا أكبر منك أصلاً)

أو بتحاول تكبتها في محاولة منك إنك تسكت صوتها،  
أو تتجاهلها، وتتصرف ويكأنك عادي،  
بس بتلاقي إنك مش مرتاح برضه، ولو كنت مضطر تاخذ  
قرار وإنت في الحالة دي بيكون مش أحسن حاجة ليك.  
كنت كده في فترة من الفترات؛  
مش ساحة لنفسى أحس بالضعف، ولا مشاعر اللخبطة  
والتوهة

لحد يوم وفاة أختي الصغيرة،  
تجربة من أصعب التجارب اللي عيشتها في حياتي، أنا انهرت  
حرفيا بشكل أنا مكونتش ممكن أتصوره..  
وكل اللي كانوا حوالِيّ وشافوني مكنوش مصدقين..  
إنتي القوية! الجامدة!  
إزاي؟؟!!

إزاي!!..! لأنني بشر  
في الوقت ده حسيت إني بعيط عن كل موقف حبست فيه  
دموعي، وقلت لنفسى مينفعش تعيطي إنتي جامدة!  
عن كل مشاعر ضعف حسيتها، واتظاهرت بعكسها، وقلت  
لنفسى مينفعش تضعفي إنتي قوية!  
وقتها ما كنت اتصوره دفاعات... انهار  
وبعد ما اتعلمت واتنورت ونضجت..  
فهمت إن دي مكنتش أفضل طريقة للتعامل مع مشاعري..



فهمت إن المشاعر عبارة عن رسول جاي يبلغك رسالة  
علشان تتعامل بناءً عليها مع الموقف، فمينفعش تقتل الرسول  
وتدفنه بالرسالة من غير ما تقراها وتقول موصلنيش حاجة!  
فهمت إن الألم ممكن يكون جواه هدية..

فهمت إن أوقات الضعف دي جزء من كوني بشر، فتقبلتها..  
بقيت بعامل الرسول ده معاملة الـ VIP وأفهم هو جاي يقولي  
إيه..

فهمت إنى هبقى قوية أكثر لما أتقبل بشرتي وضعفي.

## أما قبل

قبل ما تقوم بتحليل وتقييم تصرفات أي حد، وتغوص في نواياه اللي أصلاً محدش مطّلع عليها غير ربنا، فكر نفسك إن إنت زيّه وهو زيّك وفي نفس الوقت إنت غيره وهو غيرك.

إنت زيّه وهو زيّك -بشر- مش من حقنا نحكم على حد ولا نقيّم حد، ولأننا بشر هنفضل نغلط ونتعلم ونخطئ ونتوب ونجرب، فنفشل أو ننجح ونقع ونقوم، واللي ليه حق يحاسبنا هو اللي خلقنا.

وإنت غيره وهو غيرك، إنت معيشتش ظروفه وممريتش باللي مريبه.

كل واحد فينا عنده معركته الخاصة اللي محدش يعرف عنها حاجة.

سيدنا عمر يقول: (أعقل الناس أعذرهم للناس)؛

يعني اللي لما مش يفهموا تصرف أو موقف، ييلتمسوا الأعدار مش يعلقوا المشائق.

فلنرحم بعضنا.. لعل الله يرحمنا.

وقبل ما تخلي حد يتعشم فيك ويعتبرك ملجأه وملاذه، خليك متأكد الأول إنك قد المسؤولية دي،



وإنك هتكون جنبه على قد ما تقدر،  
ولو في وقت من الأوقات أو أي موقف حسيت إنك مش  
قادر تكون زي ما هو عايز، صارحه، ده حق الود اللي بينكم،  
وإوعى تكسر بخاطره.

وخليه مطمئن إن إنت دايماً موجود، حتى لو في مرة من  
المرات مقدرتش تساعد..

فيه ناس مجرد الفضفضة معاهم بتريح، وناس مجرد وجودها  
بس بيطمئن، كلمهم قبل فوات الأوان.

في مرة قريت واحدة كاتبة على الفيسبوك إن نفسها الناس  
اللي بيحبوها وشايفين فيها حاجة حلوة يعرفوها ده قبل ما  
ييجي وقت يكتبوا عنها قد إيه كانوا بيحبوها، وقد إيه فيها  
صفات حلوة وكانت وكانت..

بس للأسف مش هتكون موجودة علشان تقرا الكلام ده.

كلامها حرك جوايا مشاعر كتير، وفكرت في الكلام ده،  
ولقيت إننا فعلاً حاجات كتير بنعملها بعد فوات الأوان.  
ما لو بتحب حد ما تفرحه..

لو شايف في حد صفة حلوة عرفه..

لو حد وحشك كلمه..

لو حد رؤيته بتسعدك قوله أنا بكون مبسوط لما بشوفك.

افتحوا الـ contact list بتاعتكم وابعثوا لهم رسايل فرحهم،  
ودخلوا السعادة لقلوبهم، ويلا كلنا نرسم فرحة على وشوش  
الناس اللي بنحبها.

## إنسان في أرض الله

حب وتقدير الذات، والتواضع، وجهان لعملة واحدة،

ممكن يبانوا لأول وهلة كده إنه إزاي يعني؟

حب وتقدير الذات؛

هو إني أقدر قيمة نفسي وأحبنى من غير أي شروط ومن غير  
أي إضافات..

أقدر قيمة نفسي وأحبنى لأني صنع الله، نفخة من روحه..

قيمتي هو سبحانه اللي مديالي مش أي حد تاني ولا أي  
حاجة تانية..

مش بشكلي ولا فلوسي ولا منصبني ولا بنت مين..

ولا حتى بمهاراتي، ولا بإني بعرف أعمل إيه (لأن مهاراتي دي  
قصة تانية مالهش علاقة بتقدير وحب الذات)..

قيمتي تكمن في إني كائن مكرم من ربنا سبحانه وتعالى.

لما أدرك ده هشوفك إنت كمان بنفس الشكل ومن نفس  
المنظور، أنا وإنت زي بعض..

كائن من صنع الله..



قيمتك ربنا اللي مديهالك ..  
وهو اللي مكرمك ..  
مفيش أنا أحسن، أنا أفضل، أنا أكرم ..  
دي مفردات إبليس، أنا خير منه ..  
أنا وإنت زي بعض فليه التكبر؟

## باب الجمال

أحياناً فيه ناس بتهتم أوي بالجمال الخارجي، شكلها عامل  
إزاي؟

وزنهما قد إيه، لبسها إيه أخباره....

وبتغفل عن رؤية الجمال الحقيقي اللي فيها..

ممکن وزنك أو شكلك أو مظهرك العام يتشابه فيه ناس  
كثير،

لكن جمالك الداخلي، محدش هيشبهك فيه...

ده بصمتك انتي

خاص بيكي انتي..

جمالك انتي..

ممکن يكون في حبك للناس، في إيثارك لغيرك، في مساعدتك،  
في تواضعك، في رقيك في التعامل، في ترفعك عن التفاهات،  
في جدعتك، في عقلك، في تفكيرك، في صدقك مع نفسك ومع  
غيرك،

في تسامحك... في حاجات كثير أوي



وكل واحد فينا ماشي بين الناس بسيرته الطيبة، وصفاته  
الحلوة، وبعد عمر طويل الناس هتفتكره برضه بسيرته  
وأخلاقه..

من الآخر بتاريخه.

محدث هيفتكرك بشكلك ولا لونك ولا كنت طويل ولا  
قصير، تحين ولا رفيع؛ لأن ببساطة الإنسان تاريخ مش جغرافيا.

هيكون شيء رائع لو استوعبنا إنه:

أنا مش جميلة زيك..

أنا جميلة زيي..

كل واحد له جماله الخاص بيه، وباب الجمال بتاعه لازم يكون  
بيتفتح من جوه مش من بره.

## الله يا الله

لو حبيت حد هتعمل كل اللي تقدر عليه علشان ترضيه  
ومتزعلوش، والله المثل الأعلى، فادّعاء محبة الله بس من غير عمل  
لا تسمن ولا تغني من جوع.

هنحاول نعمل كل حاجة ترضي ربنا علشان احنا بنحبه  
وأملنا إنه يرضى عنا..

بس معنى كده إننا مش هنعمل أخطاء!!!

هنعمل أخطاء أكيد لأن كل (بني آدم خطأ)

بس نستدرك ونستعين بالله ونستغفر ونتوب لأن (خير  
الخطئين التوابون).

كل ما حبك الله هترتقي، وكل ما ترتقي هتقيس حبك للأشياء  
الأخرى اللي هي ما دون الله بمقياس المحب مش بمقياس حسي  
حتى حبك لنفسك؛

يعني مثلاً إيه أكثر حاجة أحب لنفسك خاصة لو في الشتا...

إنك تنام وتدفى ولا تقوم تتوضى وتصلّي الفجر؟!!!

بالمقياس الحسي إنك تنام طبعاً لكن بمقياس المحب...



نومك ده مش هيرضي ربنا عنك، ومش هيرفع درجاتك ومش هينفعك في الآخرة.

في معاملاتك.. شخص أساء إليك وإنه تقدر ترد، وبالمقياس الحسي نفسك هتحب إنك تتنقم لها وتأخذ لها حقها، لكن إنت وبمقياس الحب عفوت..

ليه؟! حبا لله... علشان ربنا، قال:

«وَالكَاطِبِينَ الْغِيظَ وَالْعَافِينَ عَنِ النَّاسِ وَاللَّهُ يُحِبُّ الْمُحْسِنِينَ»

صيامك... تترك شهواتك في نهار رمضان وأحب ما إلى نفسك كوب ماء بارد في الحر..

إيه اللي يمنحك وإنه لوحدك محدش شايفك من إنك تاكل أو تشرب!!!

محبتك لله جعلتك ترتقي فوق شهواتك ورغبات نفسك، ترتقي من الحب الحسي لنفسك فتذكرها بقول الرسول صلى الله عليه وسلم:

«قال الله تعالى كل عمل ابن آدم له إلا الصيام فإنه لي وأنا أجزي به»..

فتمثل وتطيع حبا لله.

## أنا مهنتي التحريض

ما تتخضوش من الكلمة.. مش كل تحريض دايمًا للعنف...  
لما أقولك مش ممكن ترجع للماضي وتبدأ من هناك فمتبصش  
وراك كثير وبص للي جاي وابدأ من الآن واصنع نهاية جميلة  
لنفسك..

لما أقولك ما تركزش مع الناس اللي مش عاجبهم تصرفاتك،  
وركز واستمتع مع الناس اللي بتحبك وبتدفعك للأمام؛ لأن  
الوقت اللي هتقضيه في إرضاء الناس كفيل جدا بأنه يوصلك  
لهدفك..

لما أقولك إن سعادتك في حياتك مرهونة بأفكارك ورسايك  
الي بتبعها لنفسك، وإنك مش نتاج ظروف أو بيئة، لكن إنت  
نتاج لأفكارك الي بتبناها وقراراتك الي بتأخذها..

لما أقولك إن نيتك الحلوة وحب الخير الي جواك في إنك  
تتغير للأحسن، وتغير الي حواليك، وتساعد غيرك، ده هيعود  
بالخير عليك تاني..

لما أقولك في كل حاجة بتعملها خد بالأسباب، واستعن بالله  
ومتخافش...



يبقى أنا مهتبي التحريض..  
بحرّض وجدانك وأفكارك على الإصرار والأمل والفرح  
والتسامح والإشراق.

## شكلني بطعم الأفراح

إنك تسمح للموسيقى اللي جواك إنها تصدح فترقص بتناغم  
معها.. دي مش حاجة سهلة..

أصل التشويش بره عالي، والنغمات النشاز كثير،  
فجأة بتلاقي نفسك مش سامع صوتك الداخلي، ومش  
متسق مع ذاتك!

هتلاقي نفسك بتحاول تتكيف، فهترقص على الموسيقى اللي  
الظروف بتعزفها لك...

واللي الناس اللي حواليك بيصقفوا عليها..

بس مش رقصتك المفضلة...

فبعد شوية بتتعب..

أصلك مكتتش عارف تكون حقيقي..

مكتتش متواصل مع نفسك..

مكتتش قادر تتواصل مع صوتك الحقيقي، مع موسيقاك  
الداخلية..

فليه متكونش إنت المايسترو، بتاع حياتك، وتستمتع بكل  
نغمة فيها..

وقتها هيطلع منك جمال إنت مكتتش عارف إنه موجود فيك.



## إقرار

الطفلة الصغيرة الي جوايا اتعودت تطلب من ربنا كل  
حاجة وأي حاجة..

أي حاجة بتتصور إن فيها خير ليها بتطلبها.

صغيرة أو كبيرة، ممكنة أو مستحيلة،

ولما الحثة التحليلية بتحاول تنط:

بس إزاي يعني؟ ده صعب جدا..

الحثة الحكيمة بتسكتها ب:

صعب على مين؟!

إنتي عبيطة... ده ربنا

طيب ربنا بيعقق لي كل حاجة بطلبها منه؟

لأ...

بس الطفلة الصغيرة مش بتزعل، ومش بتبطل تطلب!

ما هي لو مطلبتش منه، هتطلب من مين يعني!

أصلها على طول سامعة صوت الحثة الناضجة المستسلمة

لربها وهي بتقولها:

إنّني اطلبني زي ما إنّي عايزة،  
وربنا هيعمل لك اللي فيه الخير،  
يعطي أو يمنع..  
يقبض أو يبسط..  
يؤخر أو يعجل..  
مش بتاعتك ومش دورك وملكيش فيه..  
دورك تسعي وتدعي والباقي عليه..  
فإن أعطى، فله الحمد والشكر مئات المرات..  
وإن منع، فله الحمد والشكر آلاف المرات..  
فإنه يعلم ولا نعلم.



## ألوان الحياة

الدنيا بكل ما فيها عيش فيها أحلى ما فيها  
إختار اللحظة الحلوة... واللحظة المرة أرميها  
و الدنيا لو جارحة... لونها لون فرحة  
ما هو إيه بيطول عمر الواحد غير.. غير الفرحة





## لوّنها لون فرحة

ربنا مش خالقنا في الدنيا علشان يشقينا، ربنا خلقنا علشان  
نعبده ونعمر الأرض ونصلح فيها،  
ومن حسن العبادة إحسان الظن بالله ولا تتوقع من الله  
سبحانه إلا الخير.

بس أكيد الحياة كمان فيها أوقات تعب وأوقات حزن  
وعشرات.

تمام... بس مش بتمشي برضه على وتيرة واحدة... التعب  
بيتبعه راحة، والحزن بيتبعه فرح، والليل بيتبعه نهار،  
وهي حلاوتها كده في تناقضاتها.

والمهم دايماً نظرتنا احنا للأمور.. وطريقتنا في مواجهة  
المصاعب اللي بتقابلنا والمشاكل اللي بتصادفنا.

وبعدين مش الرسول صلى الله عليه وسلم قال: «إن أمر  
المؤمن كله خير»!!؟

إن أصابته سراء شكر فكان خيراً له،

وإن أصابته ضراء صبر فكان خيراً له.

الحياة جميلة لو احنا قررنا نشوفها جميلة..



كل حاجة كنت متصورها ابتلاء في وقتها لو فكرت شوية  
هتلاقي ربنا كان مغلفها لك بلطفه.

مش هتتدمر.... مش هنعيش في دور الضحية.

مش هنستسلم... علشان مهما كانت صدمات الخذلان

هتلاقي ربنا بيراضينا ويطبطب على قلوبنا

الحياة مليانة بنعم ربنا علينا

ومفيش أي عثرات هتلون حياتنا زي ما هي عايزة..

احنا اللي هنلونها لون فرحة..

## إشراقة

فيه ناس لما بتركب ال roller coaster في الملاهي بتفضل تصرخ  
أو تغمض عينيها أو تجبي وشها، وفيه ناس تانية بتسيب نفسها  
وتستمتع باللعبة..

الحياة كمان كده.. فيها نجاح وفشل فيها تعب وراحة  
وإنت واختيارك.. يا تقضيها صراخ يا تستمتع بالرحلة.



## في دايرة الرحلة

وإنت ماشي في مشوار حياتك ممكن تكتشف إنك قطعت شوط كبير في الاتجاه الخاطيء.. متقلقش.. دايمًا في فرصة لتعديل المسار وتصحيحه، فاستبشر..

وممكن الشيء اللي بتتمناه يتأخر على ما يوصلك.. ممكن ياخذ شهر، ممكن ياخذ سنة.. لكن في النهاية.. لوربنا كاتبه لك هيوصلك، فاطّمن..

متقارنش حياتك بحياة حد تاني، والأهم إنك متحكمش على حد؛ لأنك معندكش أي فكرة عن ظروفه، أو إيه اللي مر بيه في رحلته، فارفق..

وفي مشوارك هتقابل ناس كثير، وهتعرف ناس كثير، بس هنا مش مهم الكثرة أو العدد، المهم نقاء الأرواح والقلوب اللي حواليك... في ناس هتكمل معاك، وناس لأ، متزعلش، اتمنى لهم الخير، ومتخليش جنبك غير اللي يستاهلك بس، فاستمر.. كل خطوة في مشوارك إلى النجاح هي نجاح؛ لأن مفيش وصول مطلق إلى النجاح، وإحساسك بيه دايمًا متجدد، وكل ما

توصل فيه إلى مرحلة، كل ما هتكون عاوز توصل للمرحلة اللي بعدها، فاستمتع..

رؤية اللي حواليك ناجحين وسعداء مش هتنقص من نجاحك وسعادتك حاجة، فالحياة رحلة احنا فيها رفقاء، ومش منافسة إما إنت يا إما هم، فافرح لهم..

في دايرة الرحلة.. استبشر، واطمن، وارفق، واستمر، واستمتع، وافرح..



## مشوار اسمه حياة

الحياة مشوار، وفي كل محطة من محطاتها نكون متحاورين  
بناس كتير..

لكن هل الناس دي هتفضل موجودة؟

هل اللي جنبك النهارده.. هيفضل جنبك على طول؟

وهل الدور اللي يلعبه في حياتك.. هيفضل يلعبه على  
طول؟!!

العلاقات الإنسانية من أنبل العلاقات، ومن أكثرها تعقيداً  
وحساسية..

وأبسطها في نفس الوقت..

بس لو أدركنا إننا في المشوار ده في حياة بعض مراحل؛

فيه ناس بتجيلك رسالة، فيه ناس بتعلمك درس..

فيه ناس بتأخذ منك، وفيه ناس بتديك..

ودوركم انتو الاتنين في حياة بعض بيقل أو بيتتهي لحكمة  
ما..

لو احترمنا خصوصية بعض..

لو عرفنا نخط healthy boundaries ..  
مش نسيب الدنيا كده سداح مداح ..  
ونعرف إمتى نقول آه، وإمتى نقول لأ ..  
وايه اللي مسموح بيه، وإيه اللي مش مسموح ..  
لو تقبلنا اختلافاتنا في الرؤى والقناعات ..  
نحترم إن غيرنا ليه رأي، وليه حرية اختيار ..  
وإن كل وجهة نظر فيها احتمالية من الصواب، واحتمالية من  
الخطأ  
منعيلش سقف التوقعات، ومنقولش متخيلتش إن فلان  
يعمل كده،  
ممكن تكون دي مشكلتك على فكرة مش مشكلته ..  
الواقع إنه بيعمل كده وعمل كده أهو ..  
متخيلتش إنت ده بقى نتيجة توقعاتك اللي مكتشش واقعية .  
ومنخلش العشم ياخدنا أوي،  
وفي نفس الوقت نلتمس لبعض الأعدار ..  
مش معنى إنه عمل الحاجة الي إنت متخيلهاش دي، إنه  
شخص وحش ..  
لأ... في اعتبارات تانية كتير ..  
وفي نقطة مهمة جداً ..  
ندخل ربنا في المعادلة؛



أصل لو سببناها لنفسنا كده، أنا وإنت هنتخسر؛  
لأن القوي فيه اللي أقوى منه..  
والذكي فيه اللي أذكى منه..  
والحويط فيه الأحوط منه..  
فلو عايز تعدل الميزان، خلي ربنا دايمًا قدام عينيك.  
وأخيرًا.. وإنت ماشي في مشوار حياتك افتكر دايمًا.. إن  
الخلق آلة في يد الجلالة.

## في القلب راح أسكن

فيه ناس ربنا كاتب عليها العطاء - مش قصدي هنا العطاء  
المادي فقط وإن كان جزء من العطاء اللي بقصده - لكن العطاء  
بمفهومه الأعم، ومديها كل الإمكانيات إنها تعطي؛  
من طولة بال، وحب، ورحابة صدر، وصبر، واحتواء،  
وقدرة عالية على الاستماع والتفهم.

الناس دي بتلاقي أي حد بيحتاج مساعدة بيجري عليهم.

تلاقيه بيقولك إنت أول واحد جيت في بالي،

وحتى لو كان فيك إيه، بتسمع، وتستوعب، وتحتوي،  
وتفهم، وممكن كمان تحل المشكلة أو تساعد في حلها بشكل  
كبير.

ده شيء جميل جدا...

إيه المشكلة؟!!

المشكلة إن بعض الناس دي أوقات كتير لما هي نفسها  
بتحتاج تتسند، بتبص حوالها مش بتلاقي حد تسند عليه!!  
المشكلة إن بعض الناس دي بتساعد وتبدي من قلبها فعلاً  
ومن طاقتها..



بس وهي بطاريتها مليانة، لكن لما بطاريتها بتفنى، بتبدأ تراجع نفسها، وحديث الذات يلعب أروع أدواره:

- إنها لما بتحتاج مساعدة مش بتلاقي..

- إنها بتحس بالوحدة..

- إن الناس بتشاركها آلامها وانكسارها بس، لكن مش بتشاركها أوقات فرحها.

- إنها بتحس حرفياً وفي فترات حديث الذات ده، إنها مش عايضة تشوف حد، ومش عايضة ولا قادرة تسمع من حد أي حاجة.

واحنا غالباً بتتحرك بين الدورين دول بنسب مختلفة، وفيه ناس زي ما قلت بيغلب عليها إنها معطاءة - بس ده ما يمنعش إنها ممكن تطلب - وناس بيغلب إنها تطلب، وده ميمنعش برضه إنها ممكن تدي.

لو إنت من الناس اللي بيغلب عندها العطاء:

• متسيش بطاريتك تفضى اشحنها أول بأول.

• قبل ما يبدأ حديث الذات ده، احمد ربنا انه خلاك أول حد بيحي في بال اللي محتاج مساعدة.

• لما إنت نفسك تكون محتاج مساعدة، اطلب وما تترددش وهتلاقي ألف مين يقف جنبك.

• ولو إنت من الناس اللي بيغلب عليها الطلب:

• شارك اللي طلبت مساعدته نجاحك وأوقات فرحتك.

• اشكر اللي ساعدك.. فمن لم يشكر الناس لم يشكر الله  
(وهتكون كده بتساعده إنه يعيد شحن بطاريته).

• اسأل عنه واطمن عليه، ميكونش بتكلمه بس لو وقعت في  
مشكلة واحتاجت مساعدة.

• بفرح أوي لما حد يكلمني أو بيعت يقولي حبيت أقولك  
على حاجة حلوة حصلت لي، وأشارك فيها زي ما شاركتك  
الأوقات الصعبة.

• هتبع رسالة لمين تقوله شكراً من قلبك وبكل الحب؛  
علشان عملك حاجة فرحتك أو ساعدك في يوم من الأيام؟!!



## الكذب غيطان أحزان

قريت مرة قصة رمزية لطيفة، بتقول:

إن الصدق والكذب اتقابلوا في مرة، فالكذب قال للصدق:

«الطقس النهارده جميل».

الصدق بص حواليه وبص إلى السماء، ولقى فعلاً الطقس

جميل ..

مشيوا شوية مع بعض لحد ما وصلوا البحيرة ..

نزل الكذب إيده في المياه، وبص إلى الصدق وقاله:

«المية دافية جداً، إيه رأيك ننزل نعوم سوى»؟

الصدق نزل إيده في المياه، واستغرب إن الكذب صادق المرة

دي كمان، وإن المياه دافية فعلاً!

فوافق، ونزلوا يعوموا سوى.

عدت فترة قصيرة، وبسرعة طلع الكذب من المياه، ولبس

هدوم الصدق، وجرى واختفى ..

الصدق طلع من المياه عريان وغضبان جداً، وابتدى يجري

في كل الاتجاهات يدور على الكذب علشان ياخذ منه الهدوم

بتاعته ..

كل الناس اللي شافت الصدق عريان، دوّروا وشوشهم الناحية  
التانية، وهم خجلانين..  
والصدق جرى وهو مكسوف، وحاول يستخبي، وهوّ حزين  
جدًا..  
ومن الوقت ده الكذب ماشي وهوّ لابس لبس الصدق بين  
الناس ومصدينه..  
والناس رافضة بكل حال من الأحوال تشوف الصدق  
عريان..  
مع إن الكذب مهما اتجمل ولبس هدوم مش بتاعته هيفضل  
دايمًا غيطان أحزان..  
والصدق حتى لو كان عريان هو اللي بيدفينا.



## أنا فايق.. أنا رايق

فيه ناس بتجري بسرعة جداً بس للأسف في الاتجاه الخاطئ،  
وفيه ناس تانية بتجري علشان طلعت لقت الكل بيجري  
فجريت زيهم،

لاهي عارفة هم بيجروا ليه، ولا رايمين على فين،  
وفيه ناس بتجري علشان اتعلمت تجري علشان تسبق،  
علشان تطلع الأول..

هي اتعلمت كده، اتقال لها كده:

«لازم تذاكر كويس وتقبل الامتحان؛ علشان تطلع الأول،  
وتبقى أشطر واحد في إخوانك أو في قرابيك أو في جيرانك  
في شغلك، لازم تكون أحسن واحد في زميلك علشان تاخذ  
الترقية أو الحافز، ومديرك يبقى راضي عنك..  
لازم تكون قوي وجامد كده والناس تخاف منك، وتعمل  
لك حساب.

وقيس على كده حاجات كثير..

بس (الأسرع والأعلى والأقوى)..

ده شعار الألعاب الأولمبية، لكن مينفعش يكون شعار حياة.

احنا مش بنافس بعض على ميداليات مين هيكون الأول وهياخد الذهب، ومين فضة، ومين برونز.

احنا مش هنرتب على بعض..

دي حياة.

وفيه بيت للـ (معري) بيتعجب فيه من السلوك ده، يقول:

(تنافس قوم على رتبة.. كأن الزمان يديم الرتب..)

محتاجين من فترة للتانية نقف ونقيم أداءنا، هل احنا مبسوطين ولا بنجري وخلاص،

ونبص على عداد البنزين ولو السرعة زيادة نقللها،

أصل دي حياة مش ماراثون،

مش مهم تكون الأسرع ولا الأعلى ولا الأقوى، المهم تكون مبسوط ورايق.



## حكايتي مع الزمان

قابلت في مرة واحدة كانت من صديقاتي في مرحلة ثانوي، وكان لنا سنين مشفناش بعض، وكنت سعيدة أوي إني قابلتها؛ لأننا افتكرنا ذكريات وأيام حلوة مليانة بمشاعر الصبا والضحك والجنون، لحد ما سألتها عن أخبارها...  
كأن حد مسك فرشاة، ولونها بألوان باهتة..

قعدت تتكلم معايا وتحكي عن حياتها، بس للأسف القصة اللي بتحكيها مش حلوة،  
مش علشان القصة أحداثها مش حلوة، لكن علشان طريقة كلامها عن حياتها هي اللي مش كويسة،

هي شايقة إنها طول الوقت مضغوطة وبتعافر في الحياة، وزوي أي أم مصرية أصيلة، شغل بره البيت وشغل في البيت، ومذاكرة الأولاد، وتمارين، ولما المدارس بتقفل علشان حالات كورونا العباء بيزيد عليها، وبتبقى عايشة في وش ودوشة من نوع تاني. بتقول إنها مش مستمتعة بأي حاجة بتعملها، وحاسة إنها زي الترسل اللي داير في ماكينة، وإن جوزها مش حاسس بمعاناتها، ومش مقدر اللي بتعمله.

هتكلم هنا على تفصيلا ممكن تبان بسيطة!

استوقفتني جدا الطريقة اللي بتكلم بيها نفسها، والطريقة اللي بتحكى بيها حكايتها، والمفردات اللي بتستخدمها، مفردات تزيد من تجاعيد القلب، ومخلياها شايفة نفسها كأنها شبح، أو زومبي، بتعمل اللي بتعمله لكن بدون روح، وكان واضح جدًا إن ده مآثر على حياتها بالفعل، وعلى الواقع اللي هيّ عايشاه.

لو فضلت تفكر بالطريقة دي، هتفضل تحكي القصة، وتقيّمها بالطريقة دي، فهتفضل عايشة بالشكل ده، ومفيش أي حاجة هتتغير،

ممكن حد يسألني يعني هي الطريقة اللي بكلم بيها نفسي هي اللي هتغير الظروف اللي بره؟!

العقل زي الصفحة البيضاء ممكن يترسم عليه أي حاجة، ممكن تنقش عليه كلماتك بالسواد، وممكن ترسم عليه بالنور فراشات وأزهار،

مفيش حاجة برّاك هتتغير من تلقاء نفسها، الفكرة إنك هتشوف الحاجة اللي بره إزاي؟ وهنديها معنى إيه؟ ده الأهم، وده اللي محتاج يتغير، وده اللي تقدر تغيره فعلاً، لو أردت واخترت.

وبناءً عليه تعاطيك مع اللي بره هيختلف، وهتدوقه بطعم ثاني.



## الدنيا ريشة في هوا

تخيل تنزل تسوق عربيتك وإنّ مش عارف إنت رايح  
فين..

ساعتها كل الطرق بالنسبة لك هتبقى زي بعض..  
مش فارقة..

ما دام مفيش وجهة ولا غاية..

ال GPS هيدلك على الطريق صحيح، بس هيتحتاج منك تحدد  
له إنت فين وعايز تروح فين برضه، هو مش هيخمن،

ومحتاج كمان عربيتك يكون فيها بنزين، وقود يجرورها،

مش كفاية يكون معاك عربية، ومعاك خريطة، وعارف إنت  
فين، ورايح فين، لازم وقود.

طب معاك عربية وخريطة، وعارف إنت فين ورايح فين  
ومعاك وقود، خلاص كده؟

العربية هتتحرك، ولا ناقص حاجة كمان؟

ناقص أهم حاجة، العربية مش هتتحرك لوحدها لازم إنت  
اللي تدوس بنزين..

الحياة كمان كده.. زي العربية..

ضروري نعيشها واحنا عارفين احنا فين، ورايحين فين،  
وبنعمل إيه وليه..

ليه دي الوقود، الدافع وضروري جداً علشان نمشي بحياتنا  
محتاجين ندوس بنزين.. محتاجين نتحرك.. ناخذ خطوات،

ولو حد عمل غير كده بيتقال عليه هائم على وجهه، يعني  
ماشي كده ومش عارف هو رايح فين..

زي الريشة في مهب الريح.



## بحر الحياة

إنك تكون مُمَيِّز في اللي إنت بتعمله دي حاجة حلوة جداً  
ومهمة كمان،

لكن الأحلى منها والأهم من وجهة نظري إنك تكون مُمَيِّز،  
عندك القدرة على التمييز.

على سبيل المثال؛ عارف وفاهم نفسك وقدرك كإنسان،

عارف مطلوب منك إيه في رحلتك،

عارف قدراتك وإزاي تستخدمها صح؛

علشان وزى الإمام (الغزالي) ما قال: «إن ما تحصل عليه من  
قدرات ومواهب أمور معارة»

يعني إيه معارة؟

كأن حد كان مسلفك حاجة أو مستأمنك على حاجة ومتى  
شاء استردها منك،

وممكن تحت كلمة قدرات ومواهب دي نحط تقريباً كل  
حاجة ربنا مديها لنا،

صحة، فلوس، علاقات، علم، أولاد، والقائمة طويلة...

فالتمييز أصبح ضروري جداً،

فإزاي قبل ما أحاول أكون مُمَيِّز أكون مُمَيِّز،  
وأهم حاجة محتاج أميزها إني أعرف إيه اللي بيقود حياتي،  
الهوى ولا النفس ولا العقل ولا الروح؛  
لأن كل قائد من دول هيسخدم الإمكانيات بتاعتي بشكل  
مختلف، وهيخليني أتعامل معاها بشكل مختلف.  
بشوف إن الحياة تحت قيادة الروح بتفكرنا دايماً إن قدرتنا  
على الترقى ملهاش حدود..  
والحياة تحت قيادة الروح مش الغرض منها خالص إننا  
نتحول لملايكة، مش هينفع..  
ولا إننا نكون قديسين ولا أبطال خارقين!  
لكنها بتفكرنا دايماً احنا موجودين في الدنيا ليه؟  
وبتساعدنا كمان منغرقش في بحر الحياة أو دواماته تاخذنا،  
وقبل ما نسأل إيه اللي احنا عايزينه؟  
نسأل احنا «متعاز» مننا إيه؟!  
ويا سعده ويا هناه اللي هيكون اللي هو عايزه متوافق مع  
اللي متعاز منه.



## منشور على الشط الثاني

قرأت جملة لـ (ديل كارنيجي)، بتقول:

«دائماً ما نحلم على البعد بحديقة زهور سحرية، بدلاً من  
أن نستمتع بالزهور التي تفتح على نوافذنا كل يوم»  
فكروا في الجملة دي كده معايا..

تفتكروا إمتى نقدر نقول إننا مستمتعين بحياتنا؟

تعالوا نشوف الحدودة دي:

كان فيه مرة راجل أعمال، واقف عند بحيرة في قرية صغيرة  
في المكسيك، شاف قارب صغير بيدفعه صياد بسيط فوق سطح  
البحيرة الهادئ..

ولمح وسط القارب كام سمكة تونة بزعانها الصفراء، لما  
الصياد قرب، اتكلم معاه راجل الأعمال، وقال له إن نوعية  
السماك الي اصطاده ممتازة وسأله هو بيحتاج وقت قد إيه  
علشان يصطاده؟ قال الصياد إنه بيحتاج وقت بسيط.

رجل الأعمال رفع كتفه باستغراب وقاله طب ما تقعد وقت  
أكثر وتصطاد سمك أكثر.

الصيداد قاله بهدوء وعلى وشه ابتسامة رضا: اللي بصطاده بيكفي حاجتي وحاجة عيلتي.

بس رجل الأعمال مقتنعش بالرد ده، وقال للصيداد: أيوه، بس بقية يومك بتعمل إيه؟

الصيداد رد بنفس الهدوء والابتسامة: أنا في يومي بصطاد شوية، وارجع ألعب مع أطفالي وأتكلم مع زوجتي، وبالليل بتمشى في القرية واتسلى مع أصدقائي، فيومي مشغول، وأنا مبسوط بيه.

رجل الأعمال قال له: «أنا معايا شهادات في إدارة الأعمال من جامعة هارفارد وأقدر أساعدك»، وابتدى بكل جدية يشرح للصيداد البسيط:

«إنت ممكن تقضي وقت أطول في الصيد وتجمع سمك أكثر، ودخلك يزيد، فتشتري قارب أكبر، فتقدر تصطاد أكثر، ودخلك يزيد أكثر وأكثر، فتشتري أسطول من القوارب، فأرباحك تزيد، فتبني مصانع لتعليب الأسماك، وتتحكم في السوق، وتبقى منتج وموزع في نفس الوقت، وتتنقل إلى مدينة تجارية كبيرة، وتأسس شركاتك الخاصة».

الصيداد سأله: «وكل ده هياخد وقت قد أيه؟» رجل الأعمال قال له: «من ١٥ لـ ٢٠ سنة تقريبًا».

سأل الصيداد: «وبعد كده؟» رد رجل الأعمال بابتسامة وقال: «بعد كده هتعيش أحلى أيام عمرك، هتطرح أسهم شركتك في البورصة، ويبقى معاك ملايين الدولارات».



سأل الصياد: «وبعدين»؟ قال له «ممكن وقتها تفكر في التقاعد، وتختار قرية صغيرة هادئة تصطاد شوية، تلعب مع أحفادك، وتتكلم مع زوجتك، وتتمشي في القرية، وتتسلى مع اصدقائك»!!

الصياد قال لرجل الأعمال: «ما هو ده الي أنا بعمله دلوقتي».

فيه ناس فعلاً بتأجل تعيش حياتها، مستتية بكرة..

لما توصل لحاجة معينة،

أو لما تحقق شيء ما،

في حين إن بين أيديها اللي يخليها سعيدة،

بس هي دايمًا مش شايفاه، وعنيها على حديقة الزهور

البعيدة.

## بتبعديني عن حياتك بالملل

ما إنتي عارفة إني بحبك، لازم أقول يعني؟  
مش لازم أقولك كل يوم إن الأكل حلو، ما دام أكلت منه  
يبقى كويس.

أكيد وحشتيني، أو مال بكلمك ليه!  
كل حاجة حلوة بتتعمل، بتتشاف عادي يعني.. إيه اللي  
عملتيه مختلف؟

ما كل الستات بتعمل كده.  
طب إيه المشكلة لما تقول وتتكلم؟! بتوفر طاقتك مثلاً.. ولا  
لو اتكلمت ده هيقبل منك؟!

عدم التقدير وإنك تتعامل مع شخص على إنه موجود، على  
إنه مضمون..

مش أنسب طريقة للتعامل..  
عدم بذل مجهود في اي علاقة كفييل بإنه يضعفها، كفييل بإنه  
يعرضها لهزات..

بلاش ناخذ الناس for granted..  
بلاش نتوقع إن طرف هيفضل يدي من مشاعره ووقته



ومجهوده، والطرف الثاني حتى مش بيشكره، ولا يقوله كلمة حلوة.

لو عايزين علاقة تستمر محتاجين نستثمر فيها..

مفيش حد هيلاقى جفاء في المشاعر وبرودة في التعامل،  
وهيحب يكمل،

ولو كمل هيكمل وهو زهقان، والزهقان بيعد بعد فترة،  
ولو مبعدهش بجسمه بيعد بقلبه، فليه؟!!

## إشراقة

وإنت ماشي في مشوار حياتك هتلاقي ناس..  
لونهام بهت في عينك..  
وناس غيرهم ازدادوا بريقاً..  
وناس تانية موجودين ولكن  
لم تعد تبصرهم مطلقاً..  
ودي سنة الحياة.



## الدنيا بتأخذ وتبدي

أيام ما كنت بشتغل مدرسة كنت باخذ اجازات كتير رعاية  
طفل علشان ولادي كانوا صغيرين، وفي مرة رايحة أخلص ورق  
الأجازة من المنطقة، خبطت العربية في شارع مصطفى النحاس  
فاكرة الواقعة كويس ومكانها وظروفها لحد النهارده!

طبعاً كنت متضايقه، وباين على تعبيرات وشي، وطريقة  
كلامي، فدخلت مكتب الموظف اللي فيه، وكان راجل كبير  
كده، قال لي:

إنتي زعلانة كده ليه؟!!

قلت له خبطت العربية، ابتسم كده وقال لي وياه يعني!!!

فين المشكلة؟!!

قتله مفيش مشكلة جامدة يعني الحمد لله، بس أكيد  
متضايقه عادي.

قال لي جملة خلتنني ابتسمت وشفيت الموضوع بمنظور مختلف

قال لي ايه؟!!

لما كلنا نمشي كويس ومحدش يجبط عربيته، أو مال أصحاب  
ورش الميكانيكا والسمكرة هيشغلوا إزاي؟!!

ربنا باعتلهم رزق عن طريقك علشان كده خلاكي تغلطي أو  
خلي اللي خبطك غلط..

فمتزعلش!

الغريب إن حالة الضيق اللي عندي حدثها خفت جداً  
وكم إن وأنا بصلح العربية كنت مبتسمة وأنا بفتكر كلمته..  
وفي الحقيقة لو فكرت هتلاقي إن فعلاً ربنا بيسخرنا لبعض  
أوقات بشكل ظاهر وأوقات تانية بشكل مش ظاهر..  
وإن حال الدنيا كده، أوقات بتأخذ منك، وأوقات تانية ربنا  
بيديك ويراضيك،

وهتلاقي كم إن فيه حاجات كتير في حياتنا، ومواقف بنمر  
بيها، لو غيرنا بس الزاوية اللي بنبص من خلالها عليها، أفكارنا  
ومشاعرنا عنها هتتغير.



## سؤال

فاكرين يوم امتحان رخصة السواقة؟!

أنا فاكراه كويس جدا مع إنه عدى عليه سنين كثير...

كنت بتعلم في مدرسة بتساعدك إنك تطلع الرخصة من ورق و امتحان، وكل الحاجات دي، وكم ان كنا بتتدرب على الشكل اللي هيكون فيه الامتحان العملي في المدرسة نفسها؛ يعني بيعملوا لنا الإقماع بالشكل زي اللي هيكون في المرور بالظبط وندرب عليه أكثر من مرة.

يوم الامتحان المدرب اللي كنت بتدرب معاه، وهو بيرجع العربية من الشخص اللي كان بيتمحن قبل مني،

دخلها شوية في ضلع حرف الـ U وخلاها قريب شويتين من الأقماع اللي على يمين العربية،

أنا مفهمتش إنه عمل كده غير بعض ما حصل اللي حصل،

طبعا التوتر سيد الموقف بلا منازع،

امتحان رخصة، وظابط قاعد بيصلنا اللي هو انجزوا

وخلصونا،

وناس بتتفرج، وعندها تصور مسبق عن الستات في السواقفة.  
رايحة أركب العربية والمدرب نازل، قالي بصوت واطي  
وبسرعة..

كلام مبهم كده مفهمتش منه غير (قريبة وكيرف وعلى طول)  
يا عم أنا ناقصة لخبطة، كفاية التوتر اللي أنا فيه.  
دخلت العربية وهو يبشاور لي كده، وبرضه مفهمتش هو  
عايز يقول إيه!!

وأنا مش واخدة بالي أصلا من اللي عمله وإنه قرب العربية  
من الكيرف؛ علشان يساعدي ويقصر عليّ المسافة اللي همشيها  
قبل ما ألف!!

والنتيجة كانت... إني اتلخبطت طبعاً؛ لأن مش ده اللي أنا  
متدربة عليه،

ويمكن لتوتر الموقف كمان، اتصرفت تصرف اللي حافظ  
مش فاهم، ومعديتش الاختبار.

بعد ما نزلت وهو جه يكلمني فكلي الطلاسم اللي  
مفهمتهاش، وإنه خلى العربية قريبة من الكيرف علشان ألف  
على طول، وييلومني إزاي معديتش وهو عمل كده علشان  
يساعدي!!

الموقف ده بييجي دايماً في بالي كل ما أشوف حد يبساعد حد  
بدون إذنه،



أو يساعد حد بالطريقة اللي هو شايفها مناسبة مش بالطريقة  
اللي الشخص محتاج إنه يتساعد بيها،  
النية طيبة؟!  
مفيش شك في ده..  
بس هتكون أحسن وأفضل لو سألته إيه اللي إنت محتاجه أو  
أنا أقدر أساعدك إزاي.

## أسكن بيوت الفرح

وانت بتسعى في الحياة سيب أثرك في كل حاجة بتعملها..  
أثرك اللي يشبهك انت، اللي بيمثلك، بصمة روحك اللي  
مفيش زيها.

يعني إيه بصمة روح؛  
يعني السيدة (عائشة رضي الله عنها)، لما كانت بتعطر الصدقة  
قبل ما بتخرجها علشان عارفة إنها رايحة لربنا قبل ما تروح  
للمحتاج..

يعني لما آجي أعمل أي عمل أفكر إزاي العمل ده ممكن  
يمثلني بجودة علشان الله من وراء القصد.  
تحيلوا كده المهام اليومية والحركات والسكنات والمباحات،  
واحنا بتتصرف فيها بالحضور الواعي ده...  
واحنا كلنا بنستقبل عالم واحد مفيهوش فواصل بين الموت  
والحياة..

مفيهوش نهايات ولكن مآلات...  
هي رحلة واحدة بيمشيها الإنسان من أولها لآخرها،

وهو داخل مملكته المكونة من الجسد والروح والنفس والعقل والقلب.

كل ما هنالك إن الحياة الدينا هي وعاء العمل بس؛  
يعني مفيش انفصال بين العمل للدنيا والعمل للآخرة،  
والقرآن شديد الوضوح في الجزئية دي وقال لنا:  
«لتنظر نفس ما قدمت لغد».

يعني نعيش Intentional life

مش Attentional life

إيه الفرق؟

الفرق إنه في الأولى بنعيش في كل لحظة بوعي ووضوح رؤية:  
إن الله من وراء القصد.

وفي الثانية بنلهث وراكل ناعق أو زي ما ربنا يقول:

«كنا نخوض مع الخائضين»

والجميل في الموضوع إنه لو ظبطنا القصد وسمو الغاية والنية،  
وعيشنا بوعي ووضوح، التركيز والانتباه هيتوجهوا بشكل تلقائي  
لصالحنا مش لصدنا، وهنقدر نستمتع بحياتنا من غير ما نضيع  
اتجاهنا الروحي.


تخيلوا بس وزي ما أحد العارفين قال:

«اعبد ربك على جهة السرور به»، وخليني أفكرك بمعنى  
جميل للإمام (الغزالي)، بيقول: «إن أي عمل من أعمال الدنيا  
يتحول إلى عبادة ما دام مقرونًا بشرف القصد وسمو الغاية».



## ألوان الحرية

كل المفروض مرفوض إثبت للعالم إنك موجود  
ما تسيبش الخوف يسرق من روحك برائتها  
ويهدطموحها وجرأتها ويتحكم فيك  
جواك إنسان يقدرع الدنيا ومواويلها  
يقدرلو مالت يعدلها





## غرّد بره السرب

الوعي أو العقل الجمعي : Collective consciousness

جوستاف لوبون يعرفه إنه:

(الاستجابة غير العقلانية لما تترده الجماعة)

يعني مجموعة من الاعتقادات أو الأفكار اللي بتتردد لحد ما الناس تاخدها من المسلمات، لأ وتتناها كمان وتدافع عنها.

بلاقي صعوبة في إني أفهم؛ يعني إيه حد بيتنازل طواعية عن حقه في إنه يكون له رأي مختلف ويمشي وراقوالب جاهزة؟

والسوشيال ميديا بأنواعها بتلعب دور كبير جداً في الموضوع ده، حتى لو بان في ظاهره وفي أول الأمر هزار وسخرية،

زي مثال: العيد، وإنه بقى أيام ملل وزهق، وفين العيد؟ والكلام اللطيف ده كله، ويفضل يتردد لحد ما فعلاً ناس كتير مبتتش بتعظم أيام العيد اللي هو في جميع الديانات المفروض يكون مظهر من مظاهر الفرح، ويتحول إلى أيام كئيبة.

وفيه مثال تاني شهير: الجواز،

إنه أكبر خازوق، وإنه مقبرة الحب اللي كان مولع في الدرّة، وإن نهايته يا خيانة يا طلاق،



وبهدلة وجري في محاكم الأسرة، وتأکید بقى طول الوقت  
على الفكرة دي بس، واللي لو حد اتكلم براها يبقى بيهري  
وبيحلم..

بس مش دي الحقيقة الوحيدة في الموضوع، زي ما فيه تجارب  
فاشلة فيه تجارب ناجحة..

والتجارب اللي فشلت مش بسبب إن كل الرجالة مش بتشيل  
المسؤولية..

ولا بسبب إن كل الستات نكدية، دي برضه أفكار معلبة.

والتعميم هنا كارثة في حد ذاته، ويمثل آفة فكرية سامة..

أنا بقول كده ليه؟!!

علشان أقول لكم:

غردوا بره السرب يا جماعة، مفيهاش حاجة والله.

طب حتى استعمل حقك في إنك تقيّم الأفكار السابقة

التجهيز دي؛

إيه ال reference بتاعها؟ إيه مرجعيتها؟ بتفيدني ولا بتضرني؟

ربنا خلقنا أحرارًا، وإدانا حرية الاختيار، ليه تخلي حد يرسم

لك خط ويقولك امشي عليه؟

## اخرج من البيان

البيوت ليها باب واحد أو اتنين..  
لكن أوقات الإنسان بيقل على نفسه ميت باب؛  
باب اسمه الخوف.. خايف يخرج بره الـ comfort zone  
ليه قلبك يبقى ضعيف؟ خايف تجرب؟ طب خايف ليه..  
من الفشل؟  
ليه تسميه فشل أصلاً؟ سميّه محاولة غير ناجحة.. وحاول  
مرة تانية..  
بس متهرش.. هروبك مش طريق.. هروبك معناه إنك  
بتسلم نفسك تسليم أهال إلى الفشل..  
باب اسمه التسوية.. بكرة هبدأ.. الأسبوع الجاي... أول  
الشهر..  
والعمر بيضيع، وإنك مش حاسس، وبكرة ده ما مبيجيش.  
باب اسمه.. لو.. لو كنت أصغر.. لو كنت أكبر.. لو كان  
معايا فلوس..  
لو كان عندي وقت.. حرفين صغيرين، بس هم في الحقيقة  
شاعة كبيرة..



بتعلّق عليها أعدار.. بتأجل أحلام كتيير ممكن أوي تحقّقها..  
باب اسمه الضعف.. مش هقدر.. مش هعرف.. على طول  
حاسس بضعف وناسي إنك إنسان.. ربنا وهبك قدرات رائعة،  
وكرمك على جميع مخلوقاته،  
وأبواب تانية كتير حابس نفسك وراها.  
استعن بالله كده.. واخرج من البيان.

## مش داخل سجنك

نفسك دايمًا خايفة عليك وعيالك على طول في الـ comfort zone....

هي حالة مريحة ومطمئنة جدًا، بس مفيهاش تميز، مفيهاش تأثير، مفيهاش نور.

على مرّ التاريخ.. كان فيه عظماء سابوا وراهم ميراث ضخم من الأعمال والتأثير، مكنش عندهم أي شيء خارق!

كانوا بشر زيك زيهم بس الفرق إنهم آمنوا بنفسهم، آمنوا بقدراتهم، واتحركوا، وحطّ تحت اتحركوا دي ١٠٠ خط،

لو حطّيت في اعتقادك إنك مش هتقدر، فانت كده بتهزم نفسك في معركة إنت ما دخلتهاش أساسًا.

اعرف نقاط قوتك، وتميزك، وإنت بارع في إيه، وامتخفش من أي فشل أو من أي ألم، وابدأ حياة جديدة، حياة كبيرة.. املاها إنجازات، وحرر نفسك من أي قيد أو عائق، واصرخ في وش أي شيء بيوقفك أو بيعجزك..

وكلم نفسك بإيجابية وإصرار، وقولها وقول لكل قيد بيكتفك بيكبلك :

«مش داخل سجنك مش عايز».



## إشراقة

استمر في التأمل والتعلم والتغيير..  
افتح الباب واسمح لشعاع الضوء أن يقترب..  
اسمح لرسائل الكون أن تفاجئك..  
واستقبلها بحفاوة

## من قلمك ارسم لونك

اسمع صوت عقلك وقلبك، وخليك مقتنع بالشيء اللي إنت بتعمله، عيش حياتك بالشكل اللي يخليك راضي عن نفسك، مش شرط أبدًا تعيشها بالشكل اللي يرضي الآخرين.

يعني لو وزنك زايد شوية بس مش مسبلك مشكلة، فمش ضروري تحرمي نفسك من حاجات بتحبيها علشان محدش يوصفك بالتخن.

ولو إنت راضي عن شكلك وشعرك الطويل فمش لازم تلتفت إلى سؤال: إنت ليه مش بتحلق؟

في النهاية ده شعرك يعني وإنت اللي شايله، مش هم.

مترتبطيش بحد مش مقتنعة بيه؛ هربًا من نظرة الناس إلى البنت اللي كبرت ولسه متجوزتش؛ لأن نفس الناس دي بتبص إلى المطلقة نظرة أصعب.

ادرس الحاجة اللي إنت عايزها، واشتغل في المجال اللي إنت بتحبه، واوعى تتخلى عن حلمك أو هدفك علشان ترضي الناس؛ لأن ببساطة العمر بيعدي وهتبص لحياتك يا هتلاقيها كلها شخطة يا إما..

متلونة.. بس للأسف.. مش بألوانك المفضلة.



## وده حب إيه اللي من غير أي حرية

حب الذات صفة من صفات الأقوياء، الضعفاء ميعرفوش  
يجبوا نفسهم..

حب الإنسان لنفسه هو أسمى أنواع الحب، وأطهرها، لو  
كان بطريقة صحيحة وخالي من الأنانية،  
وإنت علشان بتحب نفسك صح، فيه حاجات محتاج تتحرر  
منها..

تفتكر إيه اللي محتاج تستغنى عنه؛ علشان تحس إنك اتحررت  
ومش متقيّد؟

مش شرط تكون حاجة مادية بس.. ممكن تكون فكرة..  
معتقد أو حتى جملة سمعتها من حد في وقت ما..

زي الجملة اللي اتقلتلي لما جيت أسيب شغلي وأخذ  
الكوتشينج كاريير ليا:

«يا بنتي اللي نعرفه أحسن من اللي منعرفوش».

أكيد انتم كمان سمعتم الجملة دي كتير،

بس لما قعدت مع نفسي، وفكرت، لقيت الجملة دي ملهاش  
أي مرجعية ثابتة تسندها وتثبت صحتها.

مين اللي قال؟

مين اللي قال إن اللي نعرفه أحسن من اللي منعرفوش؟

الجملة دي أصلاً متلزمينش.. مش عايزاها..

دي ياما اتحجمت قدامها إمكانات كانت ممكن تخرج للنور..

دي ياما ناس فضلت واقفة مكانها و stuck بسببها..

وناس تانية صدقتها وفضلت ترددها، لحد ما بقت وثاق

وشدت نفسها بيه..

ياما ناس كان في حياتها صفحة نفسها تطويها، ولكن بسبب

الجملة دي مكتتش قادرة..

وبالعكس ده اللي منعرفوش طلع أحسن من اللي نعرفه!

خلينا نتفق على إن التغيير هو الثابت الوحيد في حياتنا دي،

والحقيقة إننا طول الوقت بتتغير ويمكن القناعة دي مع قناعات

تانية ساعدتني إني أعزز مهارة الاستغناء..

مش عايزة أبقى أسيرة منصب، أي حاجة ممكن أستغنى

عنها وأجرب غيرها..

هل معنى كده إني خلاص مش عايزة حاجة؟

لا طبعاً.. عايزة حاجات كتير وبشتغل علشان أحقق حاجات

أكثر، بس عايزة أنا اللي أملك الأشياء والمناصب وكل الحاجات

الي عندي مش هي اللي تملكني؛

لأن اللي بيحب نفسه هيجب ينجيها، ويزكيها ويرتقي بيها،

علشان كده بدعي ربنا دايمًا إنه ميعلقش قلبي غير بيه.



## ليه تدفعي وحدك الثمن

في درجة كده من النضج والرزانة الواحد بيوصل لها في فترة من فترات حياته، وملهاش علاقة بالسن، بحب أسميها (المرحلة الملكية)..

في المرحلة دي في حاجات كتير بتتعلم تعملها..

خليني أتكلم عن حاجة مهمة جداً منهم، ويمكن من وجهة نظري أهمهم؛

كلمة صغيرة جداً في حروفها، بس قوية في تأثيرها لو اتقالت، وقوية أكثر برضه في تأثيرها على صاحبها لو مقلهاش وقت ما كان محتاج يقولها،  
كلمة (لأ)

شفت ناس بتتكسف تقول لأ، لو اتحطت في موقف استدعى منها تقولها، بتخاف على شعور اللي قدامها،

فبترضى بظروف ضاغطة عليها هي شخصياً، وبتتحط في مواقف بتتحملها بصعوبة بالغة؛ علشان مش عارفة تقول لأ.

كان فيه واحدة قريبة مني جداً وكنت بستغرب من تصرفاتها لما تحكي لي، وكانت بتقوي أنا نفسي أعرف أتصرف، ولو فيه

وضع مضايقتني أرفضه، وإن لو حد طلب مني حاجة أقدر أقول عليها لأ.

فهمت وقتها إنها مهارة، محتاجين ندرّب عليها، مكنتش فاهمة إن ممكن يكون فيه ناس فعلاً بتلاقي صعوبة في إنها تعمل حاجة زي كده؛ لأنه مش طبيعي إننا منقدرش نقول لأ لأي حاجة احنا مش عايزينها، أو لأي تصرف مش عاجبنا.

الكلام هنا طبعاً عن لأ الصحية اللي بتساعدنا نرسم حدودنا النفسية ونعبر بيها عن حقنا، مش اللي بتهد وتقطع علاقات.. عن (لأ) اللي متغلطة بحب وبتطلع في وقتها فعلاً لما نكون رافضين أو مش قادرين نعمل حاجة، مش اللي بتتقال في أي وقت لمجرد إنها تتقال وخلاص.

محتاجين نتعلم إزاي نتقنها علشان مندفعش التمن من راحة بالنا وأعصابنا وسلامنا النفسي.



## ﴿ إشراقة ﴾

في المرحلة الملكية..  
إنت اللي بترسم حدودك..  
باب علاقاتك مفتوح..  
بس باب قلبك بينقي ويقيم!  
مش أي حد معدّي هيدخل..  
إنت اللي بتحدد..

## بننجرح ..

ليه أوقات بنتخيل إننا مش قادرين نبعد عن أشخاص أو أشياء أو أماكن حتى؟!!

لأننا ساعات بنكذب الكدبة ونصدقها!!

لو أخذنا الأشخاص على سبيل المثال؛

كان عندي عميلة لسه خارجة من حالة انفصال، وكان وصفها لخالها بكلام كفيل لو الإنسان مجروح يزود الجرح أكثر؛

إن أنا مقدرش أعيش من غيره ..

هو حياتي كلها ..

لو بعد عني أنا ممكن أموت ..

حياتي من غيره ملهاش معنى ..

وكلام كتير بالشكل ده ..

هنا احنا بندي للحاجة معاني أكثر بكثير من حقيقتها، ومش بتتكلم عن حب، احنا بتتكلم عن تعلق، ظاهره بيدي مكسب،

لكن باطنه فيه أذى كبير؛

يعني اختزال الحياة كلها في شخص أيا كان هو مين، ده شيء بيضر أكثر ما بينفع، ده إن كان بينفع أصلاً!



الحياة فيها جوانب ثانية كثير.. العلاقات في جانب منها..  
وعلاقتك بإنسان ما، ده جزء من علاقاتك الثانية برضه..  
أكيد مش كلهم بنفس الدرجة، لكن مش صح إنك تقولي  
هموت.. مش قادرة أعيش من غيره..  
كده العلاقة بقت خطر عليك، لأنك بتدوري على علاقة تخليكي  
تحسي بقيمتك، وتقولك إنتي حلوة، وجميلة، وتستاهلي تحبي..  
فتشعبطي فيه وتمسكي إيده جامد زي الطفل لما يتعلق بأمه،  
ولو بدأ يأذيك هتستحملي أي حاجة بس مبيعدش عنك؛  
علشان وجوده بيظمنك على نفسك،

ومش حقيقي إنك مش هتقدري تواصلي حياتك بشكل  
طبيعي بدون الإنسان ده،  
لأ بتحصل...

ولو بصيتي حواليك هتلاقي ناس قبلك كانت بتقول نفس  
الي إنتي بتقوليه، وقدرت تعيش واستمتعت بحياتها بشكل  
عادي جدا..

طب وصلوا لده إزاي؟!

من وجهة نظري، لما إدوا لكل حاجة حقها ومستحقها..  
مخلّوش جانب يطغى على جانب..

محملّوش الأشياء معاني كبيرة هي متستحملهاش،  
وعرفوا قيمة أنفسهم، وحبوها، وفهموا إنهم حلوين،  
ويستاهلوا يتحبوا، وإنهم مش محتاجين يدخلوا في علاقة تأذيهم  
علشان يثبتوا أنفسهم حاجة.

## طريقي داير دواير

- هو ال deadline إمتي؟

- بعد بكره.

- طيب، حلو أوي لسه عندي وقت كفاية.

وييجي بكره.. أصل النهاردة يومي كان شاق ومشحون..

هتعد أسمع شوية موسيقى كده، أو اتفرج على حاجة بحبها  
وبعدين أبدأ،

وقبل ما أبدأ محتاج اقرا كام مرجع كمان علشان أعمل  
حاجة ١٠٠/١٠٠.

دي دايرة التسويق اللي معظمنا بيدور فيها ومش يفوق إلا  
على إحساس الإحباط، وأحياناً هيحس بوخزات خفيفة كده  
من تأنيب الضمير.

طب ليه بنقع فيها؟ وليه بنفضل نلف في الدواير دي؟ وهل  
فيه حل؟

تعالوا نشوف مع بعض:

فيه تسويق بيكون وراه ضغط (يومي كان شاق ومشحون)  
فأبدأ أأجل ال task اللي عليّ؛ لأن الموضوع مش ناقص يعني،



ده الحل بتاعه إني أخفف شوية من زحمة الجدول بتاعي،  
وأرتب أولوياتي وأقسم المهام، محدش بيقدر ياكل ساندويتش  
من قطعة واحدة!

فيه تسويف بيكون وراه الرغبة في الترفيه (هاسمع شوية  
موسيقى أو أتفرج على حاجة بحبها)،  
ما هو مش كله ضرب ضرب يعني الواحد محتاج يرفه عن  
نفسه شوية..

معاك حق.. وده حله إنك تحط في الجدول بتاعك وقت  
للترفيه اكتب مثلاً ١٥ دقيقة، لأي وسيلة ترفيه مناسبة ليك بين  
المهام بتاعتك.

وفيه تسويف وراه الإحساس بإنه ياااه لسه بدري (لسه  
عندي وقت كفاية) فيه ناس طول المدة بيكون بالنسبة لها فرصة  
هايلة للتسويف، وده الحل بتاعه إني أحط لنفسي معاد أقرب من  
الموعد النهائي، وأشارك المعاد ده مع صديق أو كوتش أو متتور  
ده هيديني دافعية إني أتحرك أسرع.

وفيه كمان التسويف اللي وراه السعي للكمال (علشان أعمل  
حاجة ١٠٠/١٠٠)،

واللي بيأجل علشان يوصل للكمال زي اللي بيطارد السراب  
بالظبط،

وده الحل بتاعه إني أفكر آخر كام حاجة عملتها وبرضه  
مكنتش واصل للـ ١٠٠/١٠٠ وكانت النتيجة مرضية ورائعة  
جداً،

وأفكر نفسي إن اللي بيسعى ورا الكمال كأنه بيسعى ورا  
السراب بالظبط، وإن جمالي في عدم كمالي.  
جربوا الخطوات البسيطة دي ممكن تفيد وعدّلوا باللي  
يناسبكم.



## ليه تسكتي زمن

الست وخصوصاً الأم لازم تكون شمعة تحترق من أجل الآخرين، لازم تدي من وقتها وراحتها وجهدها وصحتها لكل اللي حوالها..

هي اللي تشرب في المجد المكسور منه حته..

هي اللي بتاكل الأكل البابت.. هي اللي مش من حقها يكون ليها وقت لنفسها..

كل الناس مهمة وهي لأ..

هي اللي تتنازل عن حبهالشيء معين أو شغفها بتعلم شىء.. هي اللي لازم تضحى؟؟

بس محدش قال تضحى بيايه بالظبط، ولا لأي مدى مثلاً..

وبتبقى هي الطرف اللي عادي إنه يضحى وعادي إنه يتنازل.

وبعد ما تعمل ده كله ويبقى وقتها كله مش ليها - وده من حالات حقيقية اشتغلت معاها- يتقالها إنتي مركزة معانا أوي ليه كده؟ شوفي حاجة اشغلي نفسك بيها.

علشان كده بقولك إنتي جزء مهم وأساسي من المعادلة،  
وإنتي بتهتمي باللي حواليك اهتمي بنفسك..  
زي ما إنتي مبترضيش ليهم بالقليل.. مترضيش لنفسك  
بالقليل.

عادة لما الأولاد بيكبروا وكل واحد فيهم بيكون ليه اهتماماته  
وانشغالاته.. شئنا ده أم أينا.. بيتدوا يعدوا.  
وبتحسي إنك بقيتي لوحدك؛ لأن فترات تواجدهم في البيت  
بتقل، خاصة لو في الجامعة أو لو اتخرجوا واشتغلوا أو سافروا..  
وده الطبيعي، ودي سنة الحياة.

لكن مش من الطبيعي، إنك تحسي إن حياتك وقفت هنا...  
مش من الطبيعي انك تحسي ان دورك انتهى...  
مش من الطبيعي إنك تحسي بالوحدة والفراغ..  
مش من الطبيعي إنك تحسي إنك بقيتي مش عندك اللي  
تديه...

دوري على الحاجة اللي كنتي بتحبيها واعملها..  
دوري على حاجة كنتي حابة تتعلميها لكن مكنش عندك  
وقت..  
دوري جواكي هتلاقي كنوز مش مستغلة ممكن أوي تكون  
بداية جديدة..

طول ما الشمس بتشرق علينا يبقى فيه فرص جديدة وحياة  
جديدة.



## يتعلم أبجدية

كان فيه مرة مدرس لغة عربية يشرح  
للطلاب في فصل ولما خلص، سأل السؤال المعتاد، فاهمين؟!  
رد واحد من الطلبة:  
لأ مش فاهم والعربي ده مادة صعبة جداً..  
وفجأة بقية الطلاب ابتدوا يقولوا نفس الكلام،  
وده يتكلم وده يتكلم عن صعوبة المادة، وإنهم مش قادرين  
يستوعبوها،  
سكت المدرس ثواني، وبعدين قال خلاص مفيش شرح  
النهارة، تعالوا نلعب لعبة.  
اندهشوا طبعاً بس ما دام في الموضوع لعبة.. يلا نلعب ماشي.  
رسم المدرس زجاجة ورسم جواها دجاجة  
وسأل:  
من يستطيع إخراج الدجاجة من الزجاجة بدون أن يقتل  
الدجاجة أو يكسر الزجاجة؟  
كل واحد منهم حاول وحاول بس محدش وصل لحل..

لحد ما واحد منهم قال بسخرية وتهكم:  
«خلاص يا أستاذ اللي دخل الدجاجة الزجاجة هو اللي  
يخرجها»  
انفجر الطلاب بالضحك،  
لكن صوت المدرس قطع ضحكاتهم وهو يقول:  
«هي دي الإجابة الصحيحة..»  
الي دخل الدجاجة في الزجاجة هو اللي مسؤول يخرجها زي  
ما دخلها،  
وانتو كمان نفس الحكاية...  
انتو الي دخلتوا في دماغكم فكرة إن المادة صعبة، ومهما  
حاولت أبسطها مش قادرين تفهموها  
ومفيش حد مسؤول عن إنه يخرج المفهوم ده من دماغكم  
غيركم»  
وده أبجدية من أبجديات التغيير، احنا الي مسؤولين عن  
المفاهيم الي عندنا..  
يا ترى كام مفهوم موجود في دماغنا مش بيفيدنا؟  
كام مفهوم بيعوقنا سواء في نظرنا لنفسنا أو في علاقتنا أو في  
شغلنا وتعاملتنا؟  
كام مفهوم محتاجين نقول إننا مسؤولين نخرجه بره دماغنا  
علشان نقدر ناخذ خطوة لقدام؟



## أنا باعشق البحر

ضاع حذاء طفل في البحر..

فكتب الطفل على الساحل: البحر ده لص.

وفي مكان تاني على البحر مش بعيد عن الطفل كان فيه  
راجل صياد، رمى الشبكة بتاعته واصطاد سمك كثير أوي..

فكتب على الساحل: البحر ده سخى وكريم أوي.

ومن ناحية تانية فيه شاب غرق في البحر..

فكتبت أمه الثكلى على الساحل: إن البحر ده قاتل وقاسي.

ورجل عجوز من صيادين اللؤلؤ نزل البحر وطلع بعد ما  
أخذ من كنوزه،

فكتب على الساحل: البحر ده مليون خير.

وبعدين البحر هاج بجنون وبعث بأواجه العالية لحد  
الساحل فمسحت الأمواج كل اللي اتكتب عليه،

وقال بهدوء شديد كأنه مكنش هائج مش شوية:

«لا تهتم لكلام الآخرين إن كنت تريد أن تصبح بحر».

## كل المفروض مرفوض

السابلايز... ليستة طويلة عريضة ثلاث أربع الحاجة الي فيها ملهاش أي لازمة، بس بتزود الضعط والعبء النفسي والمادي علينا، وتوضح قد إيه بقينا مجتمع استهلاكي فقدنا البساطة، فبقت حياتنا أكثر تعقيدا وتشعبا وتشتيتا.

مع إن أبسط الأشياء غالبًا بتكون الأصدق وهي الي بتؤدي إلى نتائج مذهلة... تفاحة وقعت قادت نيوتن لقانون الجاذبية، موقف بسيط في كل تفاصيله والنتيجة قانون غير العالم.

بس احنا الي بنحب نلهث وراء كل ما هو مزخرف ومبهر...

الـ make up الي بتحطيه كل يوم «سابلايز».. لو نزلتي من غيره تفكيرك هيفضل زي ما هو، سلوكك مش هيتغير وتعاملاتك مش هتتأثر.

الشبكة الألباس «سابلايز» لو الشخص سيئ مش هيتحول لراجل بيتحمل مسؤولياته وواجباته بمجرد إنه جاب شبكة بمبلغ وقدره.

النيش «سابلايز» اكتشفت بعد سنين إن لو مكنش عندي نيش بيتي كان هيبقى حلو برضه، وحياتي كانت هتبقى سعيدة



عادي يعني وكنت هاربي ولادي بنفس الطريقة، وعلاقتي  
بالناس مكنتش هتبوظ علشان معنديش نيش.  
وفيه حاجات تانية كتير.. قائمة السابلايز في حياتنا أطول  
بكتير من قائمة الـ supplies الي المدارس بتكدي بيها على أولياء  
الأمور أول كل تيرم.

## زوّق نجوم قلبك

يُقَالُ إنَّ فِي التَّرْكِ رَاحَةً، وَأَنَا بَاقُولِ كَمَا فِي التَّرْكِ حَرِيَّةٌ،  
فِيهِ مَفْهُومٌ ابْتَدِينَا مُؤَخَّرًا نَتَدَاوَلُهُ وَهُوَ مَفْهُومُ الدِّعْلُتْرِينِ  
فِكْرَةُ التَّخْلِصِ مِنَ الْأَشْيَاءِ الْغَيْرِ الْمَهْمَةِ الَّتِي عَامِلَةٌ زَحْمَةٌ  
وَفَوْضَى وَشَاغِلَةٌ مَسَاحَةٌ،  
زِي مَا تَقُومُ تَرْوُوقُ دَوْلَابِكُ أَوْ مَكْتَبِكُ كَدُهُ وَتَلَاقِي حَاجَاتِ  
كَثِيرٍ مِلْهَاشٍ لَازِمَةٌ، وَمَبْقَتَشُ بِتَسْتَعْمَلُهَا فَبْتَقَرَّرُ تَتَخْلِصُ مِنْهَا.  
الْحَاجَاتِ دِي لَمَا بَتَتَخْلِصُ مِنْهَا بِتَحْسُ بِحَرِيَّةٍ وَرَاحَةٍ،  
مَشُ بِسِ الدَوْلَابِ وَالْمَكْتَبِ الَّتِي مَحْتَاجِينَ يَتَرْوُوقُوا! الْعَقْلُ  
وَالْقَلْبُ كَمَا،  
فِيهِ أَفْكَارٌ وَمَعْتَقِدَاتٌ وَمَشَاعِرٌ كَثِيرٌ عَايِزٌ يَتَعْمَلُ لَهَا  
d cluttering  
مَبْقَتَشُ مَفِيدَةٌ، وَفَعْلًا عَامِلَةٌ زَحْمَةٌ وَفَوْضَى وَشَاغِلَةٌ مَسَاحَةٌ،  
وَالْأَخْطَرُ... وَآخِذَةٌ طَاقَةٌ.  
مَمْكَنٌ مَتَكُونُشُ بِتَاعَتِي أَصْلًا بِسِ أَنَا اتَعَلَمْتُ أَفْكَرَ كَدُهُ  
وَإِتْرَجَجْتُ عَلَى كَدُهُ بِحَكْمِ حَاجَاتِ كَثِيرٍ، فَكُفَايَةُ كَدُهُ أَوْ يَجْهُ  
الْوَقْتُ الَّتِي اتَحَرَّرُ مِنْهَا.



هنتح نوافذ كده على عقولنا ونستعين بربنا يرتب فوضى  
قلوبنا،  
ونتخلص من الحاجات اللي عاملة دوشة ومتقلنا على  
الفاضي،  
ومشتانا مش مخليانا نعيش بوعي وحضور،  
ولهيانا كده عن الهدف اللي علشانه احنا موجودين على  
الأرض وعنه سوف نُسأل.  
زوق عقلك وقلبك وما تحطش فيهم غير اللي يليق بيهم.

## ال «ولا حاجة»

معنى جديد وجميل حوالين حاجة عندنا كلنا تقريباً ومش  
بناخذ بالننا منها

الفراغ

بيقال إن الفراغ هو أعلى ما نملك..

إزاي بقى؟

وقت الفراغ مش عدم.. بالعكس ده وقت مليء بالمتاحات..

وقت إرادة حرة، وقت اختيار..

وسبحان الله النبي صلى الله عليه وسلم الذي لا ينطق عن  
الهوى، قالها لنا في حديث اغتتم خمساً:

(اغتتم فراغك قبل شغلك).

فالفراغ في الأصل غنيمة، فرصة تثبت فيها إنك إنسان له  
إرادة واختيار..

عكس الوقت المشغول اللي بتكون مدفوع فيه بشغلك،  
بالتزامك وبعلاقاتك بمحيطك أيًا كان.



فالموضوع مش في وجود الفراغ -الي معظمنا مش بنحس  
بيه أصلاً- الموضوع في إهداره تخيلوا..

محتاجين نفكر إزاي نتعامل مع الفراغ بوعي وحضور..  
إزاي نوظفه لفايدتنا..

إزاي نغتتمه..

وإزاي نفضي دماغنا برضه من جهة ثانية..

وإمتى يتحول الـ (لا عمل) لمتعة وفايدة.

## ألوان الحلم

رقصة شهية هي الحياة بالعشوقية والمعشقة  
مرة في مرة حلمك هواه يملا الدنيا بالزفزة  
ويبقى الحلم صورة وصوت  
لو بطلنا نحلم نموت





## كل الحدودة شوية مجهود

مين قال إن طريق النجاح سهل وممهد..  
لازم هتقابلنا عقبات، وهنلاقي حاجات بتحصل بتعرفلنا،  
وأبواب بتتسد..

بس فيه أبواب تانية هتتفتح.. وخليك واثق إنه اتقفل؛ لأنه  
مكنش هيجيلك منه خير.

مش كل الناس هتشجعنا.. هنلاقي ناس بتشكك فينا وفي  
قدرتنا،

وهنلاقي ناس بتقول: إيه اللي إنت بتعمله ده؟!

إنت ليه تاعب نفسك كده؟!

وممكن أوي في طريقنا نرتكب أخطاء.. عادي يعني.. أو مال  
هنتعلم ونتحسن إزاي؟ بس هنجرب تاني وتالت، ونتعلم إزاي  
نؤدي بطريقة أفضل.

لازم هنتعب؛ لأن النجاح مش ببلاش.. الفشل بس هو اللي  
ببلاش.

لازم هندفع التمن.. كلمتين اقراهم من اليمين إلى الشمال، أو  
من الشمال إلى اليمين HARD WORK..

لو اتعودنا عليهم مش هيكون لنجاحنا وطموحنا أي حدّ أو قيد.



## يا مولاي

أوقات كثير بنفتكر إن الدعاء وسيلة إلى غاية..  
يعني بندعي ربنا؛ علشان يحقق لنا حاجة أو يرفع عننا  
عارض،

فلو الحاجة اتحققت أو العارض رُفِع، فلا حاجة إلى الدعاء!!  
هنا بنشوف الدعاء على إنه وسيلة،

مع إنه غاية في حد ذاته، عبادة قائمة بذاتها..

صحيح ربنا سبحانه وتعالى قال: «ادعوني أستجب لكم»،

بس ده ما يخلنيش أتوهم إن مبرر الدعاء، الاستجابة من الله  
عز وجل،

فلو مفيش استجابة هبطل أدعي، لأ..

لو اتأخرت الاستجابة هبطل أدعي.. لأ برضه.

و فيه نقطة تانية؛ مش لازم الاستجابة تبقى زي ما أنا عايزة،

وزي ما قال الشيخ البوطي: هو سبحانه قد ضمن لك  
الإجابة في الوقت الذي يجبه هو طبق الحكمة التي يراها لا في

الوقت الذي تريد طبق الرعونة التي تهتاج بك وتضطرب في  
كيانك

فادعوني أمر مطلق.. فمن شأن العبد أن يظل واقفاً على  
الأبواب.. متذلاً على الاعتبار.. يمد يد الافتقار إلى مولاه وهو  
يثق بكرم الله وإحسانه وحسن تدبيره.



## إشراقة

التغيير قصة حب في الأصل  
اللي مش بيغير من نفسه ماعرفش يجبها  
واللي بيحب نفسه ضروري يتعلم إزاي ينجيها

## أنا بعشق الطريق

كل حاجة احنا بنعملها بحب أشبهها كأنها طريق بنمشيه،  
بداية من أول خطوة بتأخذها لحد ما توصل لتحقيق الحاجة  
اللي إنت عايزها، هو طريق.

في الطريق ده بتقابل ناس وبتفارق ناس تانية..

بتحقق نجاحات أوقات، وأوقات تانية لأ..

بتقابلك عقبات وعوائق، وساعات كمان الطريق بيتقفل..

ممكن تتعب في النص وتحس بالإجهاد..

ممكن الطريق يبقى زحمة، زي زحمة الشوارع وقت خروج  
المدارس..

وممكن يبقى رايق زي يوم الجمعة الصبح كده..

ساعد الناس اللي بتقابلهم، وفيدهم واستفيد منهم، خد  
منهم واديهم، وافتكردايمًا إن ربنا يبسخرنا لبعض..

افرح بالنجاحات اللي بتحققها واحتفل حتى بإنجازاتك  
الصغيرة، ولو فشلت في حاجة مش هتكون نهاية الكون، شوف  
إيه الدرس اللي أخذته وكمل طريقك..



لما تقابلك عقبات خدها تحدي، واقعد فكر إزاي تعديها لحد  
ما توصل لحل..

لو تعبت في النص، اسمح لنفسك تاخذ استراحة محارب،  
ت شحن وتستعيد نشاطك وتستعين بالله وتكمل..

لو الطريق بقى زحمة لسبب ملكش يد فيه يبقى مفيش غير  
إنك تصبر وتنتظر..

ولما يبقى رايق اجري وانطلق..

استمتع بالطريق أيا كان، أصله طريقك..

وافتكّر المبدع (عبد الرحيم منصور)، وهو يقول:

أنا بعشق الطريق.. لأنه فيه لقانا وفرحنا وشقانا..

أصحابنا، شابنا، وفيه ضحكة دمو عنا وفيه بكيث شمو عنا..

وضاع فيه الصديق... أنا بعشق الطريق..

## عيش وقتك .. عيش أيامك

الحياة قصيرة، أقصر من إنك تضيع لحظاتها وإنّ مش  
حاسس بيها..

حياتنا كلها عبارة عن أحداث، حصلت في الماضي، أو واقع  
أحنا عايشينه..

والمستقبل ده لسه في علم الغيب...

لكن فيه حاجة بتحصل بتسلب من الإنسان أيامه اللي  
بيعيشها، ومن غير ما يشعر بتخليه موجود بس مش حاضر..

وهي إنه يا إما عايش في الماضي وقلبه مليان حزن عليه، يا  
إما باصص إلى المستقبل وقلبه كله خوف وقلق.

بس الحقيقة..

ما مضى فات..

والمؤمل غيب..

ولك اللحظة التي إنت فيها..

فالحياة قصيرة، أقصر من إنك تضيع لحظاتها وإنّ مش  
حاسس بيها..



أقصر من إنك متكونش حاضر؛ لأنك مضيع وقتك في الندم  
على حاجة فاتت، أو قلقان على حاجة لسه في علم الغيب،  
والمفروض إن كل اللي إنت بتملكه هو اللحظة الحالية بس،  
اللحظة اللي إنت فيها، فخليك ابن وقتك،  
وأعظم هدية تفضل بيها على نفسك.. إنك تكون حاضر  
بوعي..

إنت فين دلوقتي؟ وتعمل إيه؟ وتعمله وليه؟  
قابلت ناس من كتر ماهي باصة على المستقبل، بقت  
متسرعة مش حاسة، ولا مستمتعة باللي بتعمله؛ لأنها بتعمله  
باستعجال وبسرعة.

السرعة اللي بقت سمة من سمات عصرنا، واللي بتحررنا  
من الاستمتاع بالتفاصيل الصغيرة، ونرجع نشتكي من الضغط  
الي احنا واقعين فيه، وفي الحقيقة احنا اللي موقعين نفسنا فيه.  
وإنت بتاكل بتستمتع بالأكل، ولا بتاكل بسرعة؛ علشان  
عندك معاد عايز تلحقه؟

لما بتقابل مع حد بتكون قاعد معاه فعلاً، ولا مستعجل  
وتبص للساعة علشان عندك حاجة تانية؟

الوقت اللي بتقضيه مع أسرتك، بتقضيه معاهم فعلاً، ولا  
معظم الوقت بيبكون كل واحد في أوضته، قدام شاشة الموبايل  
أو اللاب توب؟

تخيل إنك قاعد مع حد بتجبه، هتكون مدّي ليه اهتمام  
إزاي، ومنتبه له قد إيه، طب ما تتعامل مع وقتك كده.  
معاملة حد إنت بتجبه، مبسوط ومرتاح وإنت بتتعامل  
معاه..

طب عارف إن الإحصائيات أثبتت إن أغلب الناس اللي  
بتحقق إنجاز في حياتها، هي اللي بتُحسن الاستثمار في اللحظة  
اللي هي فيها والحاضر بتاعها؟  
قرر دلوقتي تاخد من كل دقيقة كل ما فيها وتحس بونس مع  
وقتك ويومك.



## تاعبني سؤالي

كم مرة جت قدامنا فرص!  
ساعات بتيجي قدامي فرصة إني أشتري حاجة كويسة بس  
مش بشترها..

ويكون قدامي فرصة أسافر مكان حلو بس مش بسافر..  
أو يكون قدامي فرصة أدرس حاجة معينة عجباي بس مش  
بدرسها..

وحاجات زي كده كتير..

ويبدأ الصراع الداخلي بين الطفلة اللي جوايا اللي نفسها  
تاخذ كل حاجة هي عايزاها، فتبدأ تصرخ، وتقول:

ياااه دي كانت فرصة حلوة أوي، وتتضايق إنها فاتتها،

وبين النسخة اللي بتحاول تبقى حكيمة، فتقوم رامية السؤال  
وتسييني ألف حوالين نفسي، وهي بتقول:

يعني إيه فرصة أصلاً؟!

وإمتي أقدر أقول إن الحاجة دي كانت فرصة بالنسبة لي؟

إمتي أسميها فرصة، وإمتي لأ؟!

أنا واقفة في موقف للباصات، وفي باص رايح (إسكندرية)،  
وباص تاني رايح (شرم الشيخ)، وباص تالت رايح (الغردقة)،  
وأنا رايحة (أسوان)،

هل هفكر في أي باص من الباصات الثلاثة، ولا حتى ههتم  
إذا نادوا عليهم؟!!

أكيد لأ، لأن ولا واحد من الثلاثة دول مناسب للوجهة اللي  
أنا رايجها،

لو أنا عارفة أنا رايحة فين، وعايضة إيه، مش هيحصلي  
تشتت..

مش هشوف كل حاجة فرصة..

هشوف بس الحاجة اللي هتساعدني في الطريق، هشوف بس  
الحاجة اللي هتقربني من تحقيق اللي أنا عاوزاه..

هنا الموضوع اختلف، بقيت بركّز على اللي محتجاه فعلا،  
مش على اللي عايزاه ونفسي فيه..

مش كل حاجة الأيام هتخطها في طريقي هسميها فرصة!

فاللي فاتني مكنش فرصة وضاعت، اللي فاتني مكنش ليا

مش بتاعي؛ لانه مكنش هيقربني من وجهتي، يمكن  
بس كنت عايزاه علشان كان هيديني جرعة بسيطة من الفرح  
الموقت؟!!

يمكن!



## يعجبني توهانك في أحلامك

- ماما أنا مش عايزة أدخل جامعة السنة دي وهاخذ gap year.

- ليه؟

- لسه مش محددة عايزة أدخل إيه.

- هتعملي إيه في السنة دي؟

- هشتغل وأجرب.

- طيب خيلنا نفكر وبتناقش.

مكنش أول حوار في تقرير مصير بيني وبين حد من أولادي،

والموضوع ده بالذات مكنش سهل.

يمكن علشان جديد عليّ؛

يعني عادة النقاش بيكون حوالين أدخل أدبي ولا علمي،

طب الكلية دي ولا الكلية دي، لكن مش هدخل جامعة خالص

السنة دي!!!

مش كده وبس، ده كان فيه كلام كتير من كل اللي حوالي كلام

من نوعية:

يعني إيه تخلص السات وما تدخلش جامعة؟!!

وإنتي هتسيبها تعمل كده؟!!

هتضيعي عليها سنة؟!!

معقولة؟!!

كلام كتير كنت بسمعه من كل القرّيين مننا، وكانت إجابتي ببساطة:

«هي اختارت تعمل كده».

زي ما قلت في الأول الموضوع مكنش بالبساطة دي، بس بعد تفكير أنا وهي وباباها حطيناها في موضع الاختيار والمسؤولية.. احترمنا حقها في إنها تحدد اللي هي عايزاه، واحترمنا حيرتها وأحلامها اللي لسه مش واضحة قدامها؛

يعني خدي الاختيار، بعد ما قدمنا النصح، واللي احنا شايفينه واتفقنا على إن الـ gap دي ما تزيدش عن سنة وتدخل بعدها الجامعة بعد ما تكون اشتغلت وجربت ورسيت على كلية تدخلها، وقد كان الحمد لله.

كانت قد مسؤولية حرية الاختيار.

بحب لما أتعامل.. أتعامل كده، وحاولت على قد ما أقدر أربي ولادي على كده،

أنا بشوف إن الدنيا كلها دار اختيار، واحنا كلنا على اختلاف سننا ومستوياتنا ومسؤولياتنا، بناخد كل يوم اختيارات مختلفة في حاجات بسيطة من أول هتلبس إيه، هتاكل إيه، هتعمل المشوار ده النهارده ولا مش هتعمله،



وحاجات مهمة هتدرس إيه، هتدرس فين، تفضل في شغلك  
وللا، تكمل في علاقة ولا تنهيها، كلها اختيارات وبتحمل  
نتيجة الاختيارات دي.

وتحمل مسؤولية «حرية الاختيار» حاجة طبيعية بس يكون  
فيه اختيار الأول!!

مش أفرض على الشخص حاجة هو مش عاوزها وبعدين  
أقولّه اتحمل المسؤولية عنها!

## أنا مش واقف حتى مكاني

كام حد وهو لسه بيتعلم السواقة خبط العربية؟  
وكام حد بعد ما خبط عربيته كان قلقان ومش عايز يسوق  
تاني؟  
وكام حد اتقاله لأ، لازم تسوق عادي وإلا هتتعقد من  
السواقة!!!؟

مثال السواقة ده نموذج لطريقة تفكير متعبة جداً، واللي  
بشوفها بتقف عائق بين أي حد وبين إنه يعمل لنفسه أي حاجة  
في حياته؛

وهي إنه يقيّد نفسه ويحكم عليها بناءً على تجارب الماضي،  
والحكم ده مبيكونش على الحاضر بس، لاده بيسحبه معاه  
علشان يحكم على نفسه في المستقبل كمان..  
مش معنى إني معرفتش أعمل حاجة في الماضي، إني مش  
هعرف أعملها تاني ابداً..

كل الحكاية إني عملت جزء منها بشكل خاطئ، أتعلم إزاي  
أعمله بشكل صحيح المرة الجاية،



واللي حصل ده مسموش فشل ده اسمه محاولة مش ناجحة،  
متسمحلهاش تحكم على أدائك دلوقتي وقدام كان؛

لأن دي أسهل وصفة للإحساس بالعجز، وقله الحيلة، ومش  
هتوديك لأي حته، هتخليك واقف مكانك مش بتتحرك إن  
مكتتش هترجعك لورا.

(نيلسون مانديلا) ليه جملة بحبها أوي ممكن تعتبرها عدسة  
جديدة تشوف بيها اللي فات..

الجملة دي بتقول ايه؟

I never lose, I either win or learn!

«أنا مش بخسر أبداً، يا إما باكسب يا إما بتعلم»

لو بصيت على اللي مريت بيه بالعدسة الجديدة دي، هتكتشف  
إنه كنزك الخاص، وإن هو اللي بيديك ما يسمى بالخبرة الحياتية.

## ساعات أتوه مرات

فيه فترة من حياتي كنت مركزة على جانب الشغل أوي،  
وواخد قدر كبير من وقتي ومن طاقتي ومن مجهودي.

وكنت سعيدة بده....

مشغولة بحاجة ليها قيمة بالنسبة لي وبحقق فيها إنجاز،  
بس مكنتش واخدة بالي من نقطة مهمة جداً..

إيه هي؟!!

إن فيه جوانب تانية، وبالتدريج، ومن غير ما أحس كنت  
باخذ منها ومن وقتها علشان الشغل،

وأدائي في الجوانب دي مكنتش عاجبني، مكنتش مبسوفة  
بده، وزى ما أكون تايهة.

بس في الوقت نفسه مكنتش عارفة أنا ليه بعمل كده؟!!

بس الواحد اتعلم وفهم، إن تركيزك بيروح بشكل تلقائي  
للحاجة اللي إنت مديها قيمة،

للحاجة اللي إنت بتقول عليها دي مهمة،

ومش بتقلل من قيمة الجوانب التانية، ولكن بتخليها في



مرتبة أقل، فمش بتركز عليها أوي، ولو افكرتها هتفتكرها  
وإنت ماشي في السكة كده،

وتؤدي فيها بس وإنت مش راضي.

لو كنت عامل كده بقصد يعني وعارف إيه الأهم فالمهم،  
ومرتبه حسب أهميته عندك فده شيء جميل جداً،

لكن لو كنت - زي ما أنا كنت- في مرحلة من مراحل  
حياتي، يبقى محتاج تبص بصة على جوانب حياتك، وتشوف  
الأهمية متوزعة إزاي؟!!

إيه اللي ليه قيمة أكبر في الوقت الحالي، فهحطه في الأول  
وأديله من وقتي ومجهودي..

ولا محتاج أوازن ما بين أكثر من حاجة ليهم نفس الأهمية!!?

## الفرصة بنت جميلة

لما كنت في الأردن من كام سنة رحنا سفاري لوادى (رم)،  
وكان المفروض هنشوف الغروب من أعلى جبل هناك.

كنت مع ثلاثة أصحابي اتنين قرروا إنهم هيقعدوا تحت،  
وواحدة قررت تطلع، وأنا كنت مترددة أطلع ولا استنى معاهم؛  
خاصة إنهم قالولي إن النزول مش هيبقى سهل!

الوقت بيعدي والشمس هتنزل ومحتاجة لو هطلع أطلع  
بسرعة، فخذت قرار وتوكلت على الله وطلعت،

وأنا طالعة قلت لنفسي متفكريش في النزول اللي ممكن  
ميكونش سهل، فكري في الوادي هيبقى شكله إزاي من فوق  
الجبل،

ومنظر الغروب اللي احنا جاين أساسًا علشان نشوفه من  
فوق.

التجربة كلها جديدة ومش عارفة ممكن تتكرر تاني إمتى،  
فليه أسيب تخوف بيوظهالي،

طالما الحاجة اللي هعملها أنا أقدر أعملها فعليًا، يعني  
معنديش ما يمنع إنني أطلع الجبل وأنزله، فأنا خايفة من إيه؟!!



إن النزول «ممكن» يكون صعب؟!!!!  
طب ما هو ممكن ميكونش صعب برضه؟  
فليه مجربش؟!  
وأنا طول عمري بحب أجرب، فمخليتش الخوف يوقفني  
وهوب،

نهيت حالة التردد بسرعة!!  
وكانت تجربة من أجمل ما يكون؛ منظر الوادي بالتلال  
الرملية الملونة، والشمس وهي بتعكس أشعتها على الجبال  
الوردية، لوحة فنية بديعة الصنع، سبحان الله مكتش هشوفها  
بالجمال ده لو فضلت تحت.

ومن وقتها اترسخت عندي قناعة؛  
إني لو حظيت احتمالات الفشل قبل احتمالات النجاح في أي  
حاجة بعملها،  
عمري ما هتحرّك من مكاني.

هل فيه موقف كنت متردد فيه بس لما عملته لاقيت إن  
التردد ده كان هيفوّت عليك فرصة كانت هتخليك تعيش تجربة  
حلوة؟!!

## قلب السما المفتوح

نقول تاني.. محتاج قبل ما تحلم تفوق، تحلم وإنّت فايق..  
محتاج قبل ما تعمل أي شيء، إنك تصدق في نفسك وفي  
إمكاناتك..

رجلك ثابتة على الأرض، وآخر حدود حلمك قلب السما  
المفتوح..

وقبل ده تفكر نفسك إنّت بتطلب من ربنا اللي خزائنه لا  
تنفد..

كان فيه واحد قاعد بيصطاد وكان بيحتفظ بالسمكة الصغيرة،  
ويرمي السمكة الكبيرة في البحر تاني، فالي شافه استغرب  
تصرفه جدًّا، وسأله:

«إنّت ليه بتعمل كده؟»

رد عليه وقاله: «علشان المقلاة بتاعتي صغيرة».

قصة رمزية بسيطة بتصور اللي معظمنا بيعمله طوووول  
الوقت؛

بنرمي الأحلام الرائعة، والأفكار الكبيرة اللي هي احتمالات  
ممكنة لنجاحنا ورا ظهرنا، علشان معتقدين إنّها أكبر من  
إمكاناتنا، زي المقلاة بتاعت صاحبنا.



وده مش في النجاح المادي بس، لاده في جوانب كثير من حياتنا.

ممكن نحب ونتحب أكثر مما نتوقع..

ممكن نكون أسعد ونعيش بشكل أجمل وأكثر فاعلية مما نتخيل..

إيه اللي هيحصل لو رميت مقالاتك الصغيرة واستبدلتها بمقالة أكبر؟

إيه اللي هيحصل لو قررت إنك مترضاش بأقل من اللي إنت تستاهله فعلاً؟

إيه اللي هيحصل لو قررت تعيش بشكل فعال وأكثر سعادة؟

إيه اللي هيحصل لو حلمت بشكل أكبر، وتوقعت نتائج أكبر، ودعيت ربنا يديك أكثر؟

إيه اللي هيحصل لو أمنت بنفسك، وبنقاط القوة اللي فيك، وأحسنت الظن بربك، وإنك كلك ثقة في اللي بين إيديك، وأمل في اللي عند ربنا!!

الرسول عليه الصلاة والسلام يقول: (إذا سألتكم الله فاسألوه الفردوس الأعلى).





بس مش الطبيعي إننا نمشي في الدنيا مش عارفين احنا  
بنعمل إيه ولا راجين فين..

ومتخليش حاجة توقفك، يعني اللي وصلوا وحققوا الحاجات  
الي هم عايزينها دول، الطريق كان ممهد قدامهم، ولا مفروش  
بالورود؟!

أنا وانت عارفين إنه لأ، الحياة كلها معافرة.

## غير شطوط حلمك

علشان نعاقر في الحنة الصبح وبالطريقة الصبح محتاجين يبقى  
الكلمتين دول في دماغنا

العلماء فرقوا بين كلمتين غالبا مش بناخد بالننا إن فيه فرق  
بينهم: النجاح والفلاح

وقالوا إن النجاح متعلق بالدنيا، والفلاح متعلق بالدنيا  
والآخرة مع بعض.

النجاح أن تحقق هدف من أهداف الدنيا؛ على سبيل المثال  
تحقيق درجة علمية معينة، النجاح في تكوين ثروة، الوصول  
إلى منصب معين، الفلاح هو أن تنجح في تحقيق الهدف الذي  
خُلقت من أجله،

ربنا سبحانه وتعالى يقول: (قد أفلح المؤمنون.الذين  
هم.....)،

وتتعدد أعمال وصفات المؤمنين اللي وصفهم ربنا بأنهم قد  
أفلحوا...

فالنجاح في إقامة الصلاة، مش تأديتها بس فلاح..

النجاح في الإعراض عن اللغو فلاح..



وفي آيات تانية تزكية النفس فلاح:  
(قد أفلح من تزكى) و(قد أفلح من زكّاه)  
التزكية في معرفة الله تعالى، معرفة أنه الواحد، الأحد، الخالق،  
الواجد، المعطي.. معرفته بأسمائه الحسنى..  
تعرفه فتطيعه، فتستقيم على أمره، فتتقرب إليه بالعمل  
الصالح،  
حتى في طلب الدنيا يكون الهدف الأسمى هو رضا الله عز  
وجل.  
مش عيب إنك تكون عايز الدنيا، العيب إنك تكون عايز  
الدنيا وبس؛  
علشان فيه نقطة كمان خطيرة جداً؛  
سيدي أحمد بن عطاء الله السكندري ليه مقولة جميلة جداً،  
بتقول:

«كيف يشرق قلب صور الأكوان منطبعة في مرآته؟».

يعني لو الإنسان كان «كل» اهتمامه الدنيا، والفلوس، والناس،  
والمظاهر، والزعامة، والشهرة، والمكسب، ودي اللي عبر عنها بـ  
(صور الأكوان).

و«كل» يعني الحاجات دي هي شغله الشاغل، وأكبر همه بينام  
ويصحى وهو مبيفكرش غير فيها، فيها هي وبس، وماشي في  
الدنيا طبعاً بيتصرف بناءً على اللي مالي قلبه.

فغير شطوط حلمك وبطل في وهم تعوم لأن الدنيا صور  
وهمية

والقلب زي المرآة بينعكس عليها صور من حال صاحبه،  
فمرور الوقت ظلام الأهواء والشهوات دي ييملاً القلب أو  
ينكت فيه نكت سوداء، وهي الران الي رينا عز وجل ذكره  
في قوله: (كلا بل ران على قلوبهم ما كانوا يكسبون).

فكيف له أن يشرق!!!

والظلام والضيء إن احتل أحدهما القلب غاب عنه الآخر،  
نقيضان لا يجتمعان.



## إشراقه

الغني الي بيكون قلبه مطمئن ..  
حتى وإن قلّت ممتلكاته ..  
فغناه في قلبه .  
وغير المطمئن تسمع اضطراب قلبه ..  
حتى وإن ملك الدنيا وما عليها .

## شيء من بعيد ناداني

(روبين سبكيولاند) في كتابه «اضغط الزر وانطلق» يتحدث  
قصة ظريفة جدًا:

«تم إرسال بائع أحذية أمريكي في مهمة تستغرق أسبوعين  
إلى إحدى الدول النامية؛ ليرى إن كانت هناك أي إمكانية لإقامة  
أعمال فيها، وبالفعل استقل البائع الطائرة، وجاب الدولة لمدة  
أسبوعين، ثم عاد ليخبر رئيسه:  
”أيها الرئيس، لا توجد لنا أي فرصة في هذه الدولة، إنهم لا  
يرتدون أي أحذية هناك على الإطلاق».

كان الرئيس رجل أعمال ذكي، وقرر أن يرسل بائعًا آخر في  
نفس المهمة إلى نفس الدولة، استقل البائع الآخر الطائرة في رحلة  
مدتها أسبوعين، وعندما عاد أسرع من المطار إلى شركته مباشرة  
ودخل إلى رئيسه والحماس يملؤه:

«أيها الرئيس، لدينا فرصة رائعة لبيع الأحذية في هذه الدولة،  
فلا يوجد أحد يرتديها بعد».

القصة دي وريتنا وضع واحد وموقف واحد ولكن نظرة  
الناس ليه اختلفت،



الموظف الأول شاف الوضع مش فرصة خالص بالعكس  
شافه يدعو للتشاؤم، ونفس الوضع شافه واحد تاني فرصة  
رائعة،

فنظرتك للأموهه اللي بتحكم، هي اللي هتخليك قادر  
على إنك تشوف وميض الفرص، ولو كان خافت، وجايلك  
من بعيد،

الفرص موجودة قدامنا يمين وشمال في كل مكان، ولكن  
ليس كل عين ترى، ولا كل أذن تسمع زي ما بيقولوا.

## الخطف

في يوم من الأيام كتبت صديقة ليا على جروب من الجروبات  
اللي بتجمعنا إن فيه تكييف شارب جديد للبيع وبسعر حلو أوي  
أقل من سعره في السوق بكثير..

فات كام يوم مش كتير يعني، وحد سأل قدامي على مكيف،  
فقلت اسأل لها صاحبتني دي عليه قالت لي:

- اتباع في ساعتها.

- ايه ده بالسرعة دي!!

قالت لي: الخطف.

الحكاية دي نطت في دماغي بعدها وأنا بسمع تفسير (إنهم  
كانوا يسارعون في الخيرات).

كان بيقول إيه بقي:

لو اتعرض عليك عمل خير، متترددش، اسرع واعمله، ولو  
فيه مساهمة في عمل خير ساهم... ليه؟!

لأن أعمارنا كلنا قصيرة زي الرسول عليه الصلاة والسلام ما  
قال ما بين ال ٦٠ وال ٧٠

لأن عمل الخير هو اللي هيبقى في الأرض، وهتفضل تاخذ في  
حسنت.



ولأن فيه مساحات في كل شيء، إما أن يملؤها أهل الخير  
بالخير، وإما أن يملؤها أهل الباطل بالباطل، (زي الفيديوهات  
اللي ملهاش أي وزن ولا قيمة ومالية التيك توك مثلاً).

ولأن الخير لو إنت مخدتهوش وسارعت إليه (يسارعون مش  
يعملون)، هيبادر إليه غيرك وهاخده (زي المكيف اللي اتخطف  
كده) ما هو الخير هيتعمل هيتعمل لو مكنش بيك هيبقى  
غيرك، واحنا أحوج ما نكون من غيرنا.

ولأن للأسف أهل الباطل يسارعوا في عمل الباطل والشر  
وواخدين الموضوع جد أوي،

ولما يبجي قدام حد باب خير أو تذكرة لعمل خير - مش  
الكل طبعاً - بيدأ يفكر؛

طب نشوف ربنا سبحانه وتعالى يقول ايه:  
«قال رب ارجعون».

ليه يا ترى عاوز يرجع؟!!

«لعلي أعمل صالحًا فيما تركت»

يعمل أي عمل صالح بوجه عام.

وفي آية ثانية:

«فيقول رب لولا أخرجتني إلى أجل قريب»

أيوه لو اتأجل لك معادك هتعمل إيه؟!!

«فأصدق وأكن من الصالحين»

ذكر الصدقة هنا بوجه خاص.

متفكرش في أي عمل صالح بادر، سارع متخليش فرصة  
تفوتك...

## القوة دائماً في إيديك

قررت أكل أكل صحي، وسبحان الله في نفس اليوم اختي  
بعتلي صنف حلو هي بتعمله تحفة، وأنا بحبه جداً خصوصاً  
لو من ايديها،  
أعمل إيه هاكل بقى وأمري لله ولما يخلص نبدأ النظام  
الجديد،

بس قدامكم أهو..

أنا كنت ناوية..

ثواني طب والقرار؟!!

- أنا كنت مقررة فعلاً

بس هي اللي بعثت أعمل إيه ايه؟!!

ok -

ومين اللي أكل

- أنا...

بس النفس بقى، والشيطان شاطر، والبنّي آدم ضعيف.

هي اللي بعثت والنفس والشيطان والضعف الإنساني و...  
و... ممكن لسته طويلة عريضة كلها حاجات بره عني.



أي سبب غير إني أنا اللي اخترت أكل ..  
اي سبب غير إني أنا اللي اخترت ملتزمش بالقرار اللي أنا  
برضه اللي كنت واخده ..  
سيناريو بيتكرر بتشابهه في مواقف مختلفة وسياقات كثير في  
حياتنا ..  
حله في كلمة بسيطة «المسؤولية» ..  
المسؤولية قوة، والتخلي عنها طوعية ضعف  
لو عايزين نمسك بزمام حياتنا ونعمل أي تغيير ضروري  
نقول إننا مسؤولين عن قراراتنا واختياراتنا.

## وكأني عصفور

لما كنت في ثانوي كانت صاحبتني بتذاكر معايا عندي في بيتنا،

كل يوم لما تيجي تمشي تقول لماما:

«ادعيلنا يا طنط».

ماما الله يرحمها تقولها، ربنا يديكم على قد تعبكم يا بنتي،

وهي كل مرة تقولها ليه كده بس؟

ومرة تانية ما بلاش الدعوة دي يا طنط،

وتقريباً الموقف ده بيتكرر كل مرة،

وأنا كنت بضحك.

مكنتش بتضايق من دعوة زي كده..

كنت بسمعتها من ماما كثير، هي وجملته: ربنا معاكي..

فاكرة كانت دايمًا تقولي:

«مش إنتي ذاكرتي؟ خلاص متخافيش..»

اعملي اللي عليكى وتوكلي على الله»

اتعلمت من أمي التوكل بمعناه الصحيح:

«جوارح تعمل وقلوب تتوكل»



زي الطيور والعصافير كده، بتطير وبتسعى وربنا بيرزقها،  
وكنت وما زلت بشوف إن لو ربنا إداني على قد تعبني فده  
العدل،

ولو إداني أكثر فده الفضل.  
دايمًا ربنا سبحانه وتعالى بيعاملني بفضله،  
ويديني أكثر من تعبني وأكثر مما أستحق.

## أقرأ أنا المذكور أعلاه

على مدار حياتي اكتشفت إنني أقدر أستغنى عن حاجات كثير، ومش زي ما كنت خائفة إن لما أسيبها حياتي هتتأثر، بالعكس اكتشفت إنني حسيت بالحرية أكثر..

إحساس إنك مش أسير لحاجة ده إحساس عظيم جداً..

يعني موجودة أهلاً وسهلاً..

مش موجودة برضه أهلاً وسهلاً.

حاجات كثير الواحد مننا بيتخيل إنه ميقدرش يستغنى عنها أو يعيش من غيرها،

مش بس حاجات، وفيه علاقات كمان بنبقى مش قادرين نتصور حياتنا وهم مش فيها،

بس من وجهة نظري دي مش حقيقة،

ربنا سبحانه وتعالى بيحطنا في طريق بعض، واحنا بتتعلم من بعض، وبتأثر في بعض... بس ده لفترة؟

فاللي بعد عنك ده مبعدهش علشان ينغص عليك عيشتك، ولا علشان يأذيك ويتعبك،



هو ربنا بعده علشان أدواركم في حياة بعض خلصت ودي  
سنة الحياة.

كل ما عززت مهارة الاستغناء، تخففت من القيود،  
و كل ما طهرت قلبك من التعلق بالمتغيرات، ازداد تعلق  
بالباقى الذى لا يتغير،  
و كلما ازددت تعلقًا بالباقى سبحانه أصبح غناك فى قلبك.  
مش دعوة للتخلي أبدًا،

ولا هي برضه دعوة للدروشة والزهد بمفهومه الدارج  
لكن دعوة بإنك تخلي الدنيا كلها بالي فيها فى إيدك مش  
فى قلبك، فمتديهاش حجم أكبر من حجمها، ولا تحملها معنى  
متستحملهاوش ..  
دعوة للاستمتاع بالعزة والترفع والغنى الحقيقى.

## إشراقة

حواديت، الدنيا كلها حواديت..  
والشاطر اللي يفهم المغزى قبل جملة.  
وتوتة توتة خلصت الحدوتة.



## كلمة أخيرة

لصلاح جاهين قصيدة جميلة بتقول:

اتكلموا

محلا الكلام ما ألزمه ما أعظمه

في البدء كانت كلمة الرب الإله

خلقت حياة والخلق منها اتعلموا

فاتكلموا

الكلمة إيد الكلمة رجل الكلمة باب

الكلمة نجمة كهربية في الضباب

الكلمة كوبري صلب فوق بحر عباب

الجن يا احباب ما يقدر يهدمه

فاتكلموا... اتكلموا

فأنا قررت اتكلم قررت لإني:

أحب الحياة

أحب الخير

أخترت أن أكون مِعُولُ بناءٍ  
لا مِعُولُ هدم  
استمع إلى زركشات الكلمات التي ترسمها الشفاه  
ولكن انصت الى اللحن الصادق الذي عزفته القلوب  
فالقلوب لا تكذب ولا تتجمل  
اعشق الصفح  
انثر السعادة  
اتنفسُ حبًّا  
فإن كان للقبح لون  
فللجمال ألوان

نادية عبد الغفار

القاهرة، الجمعة ٣١ / ١٢ / ٢٠٢١



## الفهرس

٥	إهداء .....
٧	امتنان .....
٩	كلمة من القلب .....
١١	ألوان الحب .....
١٧	ده عينك شبايك .....
١٨	مش كان أحسن حاسبتك .....
٢٠	أبشروا .....
٢٢	مالية جيوها سكر نبات .....
٢٤	فتافيت الماس .....
٢٥	إشراقة .....
٢٦	ولا يمكن طلقة هترسم كون .....
٢٩	إمبارح كان عمري عشرين .....
٣٢	أبعد حزني .....
٣٤	بالاختصار بحبني .....
٣٦	إنتي نبع الحب صافي .....
٣٨	علموني .....
٤٠	حاجات وبتفرح .....
٤٢	حبيك بعث لك هدية .....
٤٥	أما قبل .....

٤٧	..... إنسان في أرض الله
٤٩	..... باب الجمال
٥١	..... اللهُ يا اللهُ
٥٣	..... أنا مهنتي التحريض
٥٥	..... شكّلني بطعم الأفراح
٥٦	..... إقرار
٥٩	..... ألوان الحياة
٦١	..... لونها لون فرحة
٦٣	..... إشرقة
٦٤	..... في دايرة الرحلة
٦٦	..... مشوار اسمه حياة
٦٩	..... في القلب راح أسكن
٧٢	..... الكذب غيطان أحزان
٧٤	..... أنا فايق.. أنا رايق
٧٦	..... حكايتي مع الزمان
٧٨	..... الدنيا ريشة في هوا
٨٠	..... بحر الحياة
٨٢	..... منشور على الشط الثاني
٨٥	..... بتبعديني عن حياتك بالملل
٨٧	..... إشرقة
٨٨	..... الدنيا بتاخذ وبتدي
٩٠	..... سؤال
٩٣	..... أسكن بيوت الفرح
٩٧	..... ألوان الحرية

- ٩٩ ..... غرّ دبره السرب
- ١٠١ ..... اخرج من البيان
- ١٠٣ ..... مش داخل سجنك
- ١٠٤ ..... إشرقة
- ١٠٥ ..... من قلمك ارسم لونك
- ١٠٦ ..... وده حب إيه اللي من غير أي حرية
- ١٠٨ ..... ليه تدفعي وحدك الثمن
- ١١٠ ..... إشرقة
- ١١١ ..... بننجرح
- ١١٣ ..... طريقي داير دواير
- ١١٦ ..... ليه تسكتي زمن
- ١١٨ ..... يتعلم أبجدية
- ١٢٠ ..... أنا باعشق البحر
- ١٢١ ..... كل المفروض مرفوض
- ١٢٣ ..... زوّق نجوم قلبك
- ١٢٥ ..... ال «ولا حاجة»
- ١٢٧ ..... ألوان الحلم
- ١٢٩ ..... كل الحدودة شوية مجهود
- ١٣٠ ..... يا مولاي
- ١٣٢ ..... إشرقة
- ١٣٣ ..... أنا بعشق الطريق
- ١٣٥ ..... عيش وقتك.. عيش أيامك
- ١٣٨ ..... تاغبني سؤالي
- ١٤٠ ..... يعجبني توهانك في أحلامك

١٤٣.....	أنا مش واقف حتى مكاني
١٤٥.....	ساعات أتوه مرات
١٤٧.....	الفرصة بنت جميلة
١٤٩.....	قلب السما المفتوح
١٥١.....	افتح باب الفرصة وعافر
١٥٣.....	غير شطوط حلمك
١٥٦.....	إشراقة
١٥٧.....	شيء من بعيد ناداني
١٥٩.....	اتخطف
١٦٣.....	وكأني عصفور
١٦٥.....	أقر أنا المذكور أعلاه
١٦٧.....	إشراقة
١٦٨.....	كلمة أخيرة
١٧٠.....	الفهرس



